

**KALIKATA LITTLE MAGAZINE LIBRARY-O-GABESHANA KENDRA**  
**18/M TAMER LANE, KOLKATA-700009**

|  |   |
|--|---|
| Record No. : KLMLGK 2007/  | Place of Publication : <i>৩ নং (২৫) নং স্ট্রীট, কলকাতা</i>  |
| Collection : KLMLGK  | Publisher : <i>শ্রীমতী (৩৫) স্ট্রীট</i>   |
| Title : <i>সবুজ পত্র (Sabuj Patra)</i>   | Size : 7.5 " x 6 "  |
| Vol. & Number :<br><i>5/6</i><br><i>5/7-8</i><br><i>5/9</i><br><i>5/10</i><br><i>5/11</i><br><i>5/12</i> | Year of Publication : <i>১৯৬২</i><br><i>১৯৬৩-১৯৬৪</i><br><i>১৯৬৫</i><br><i>১৯৬৬</i><br><i>১৯৬৭</i><br><i>১৯৬৮</i> |
|  | Condition : <input checked="" type="checkbox"/> Brittle / <input checked="" type="checkbox"/> Good                |
| Editor : <i>শ্রীমতী (৩৫) স্ট্রীট</i>   | Remarks :   |

|                        |
|------------------------|
| C.D. Roll No. : KLMLGK |
|------------------------|



## “একতারা”।

( শ্রীবিজেন্দ্রনারায়ণ বাগচী প্রণীত )

দরদীর আঙুলের স্পর্শে একতারা যে সেতারকেও হার মানাতে পারে, বিজেনবাবু তা দেখিয়েছেন—কিন্তু দাম্পত্য-প্রেমের সুর বক্তৃতার সভায় যতই উচ্চ হোক না কেন, বিশ্ব-সাহিত্যের দরবারে তা এখনো মাথা নীচু করে আছে। এর কারণ আর কিছুই নয়, ও-সুর বড় বেশি সংকীর্ণ, বড় বেশি গী-যেঁসা। ও-সুরে যে-যত্নী যত প্রাণ-পণেই মুচ্ছনা দিন না কেন, অপরের হৃদয় তাতে মুচ্ছিত হয় না। পদাবলীর সুর যে একদিন বিশ্বের মরমে পৌঁছেছিল, তার কারণ, অস্ত্র যাই হোক, রস-সাহিত্যে পরকীয়া, পত্নীর চেয়ে বড়। সে পরকীয়া রাখাই হোন আর রজকিনীই হোন।

সোজা কথায় বলতে গেলে কবির পার্শ্বিক প্রিয়। যে পরিমাণে মানসী সেই পরিমাণে তিনি কাব্যের বস্তু—যে পরিমাণে তাঁর ব্যক্তির রূপটি ধর্মের রূপে মিলিয়ে যায়, সেই পরিমাণে তিনি বিশ্বের চোখে হৃন্দর। তবে একথা জোর করে বলা যায় যে, যে তারে দাম্পত্য-প্রেম স্ফুরিত, সেই তারেই কবি মাঝে মাঝে ব্যঙ্গনার বিদ্যুৎ এমন ভাবে সঞ্চারিত করতে পারেন যে, আমাদের সৌম্যবক্ত মন চূষকের মত অসীমের দিকে ফিরে যায়, বিজেনবাবুর ‘একতারা’য় সেই বিদ্যুতের প্রবাহ আছে।

এ যুগের প্রায় সমস্ত কবির রচনায় রবীন্দ্রনাথের কবিতার ছাপ দেখা যায়। এটা সজ্ঞান অনুকরণ না হলেও অনুকরণ এবং অনুকরণ আর কিছু না করুক ব্যক্তিত্বকে লোপ করে দেয়। অবশ্য এ অনুকরণ খুবই স্বাভাবিক, খুবই ক্ষমার্হ—কারণ অত বড় কবির জীবদ্দশায় তাঁর প্রতিভার ইন্দ্রজাল ভেদ করা যে-সে শক্তির কাজ নয়; কিন্তু এটাও ঠিক যে, তা না করা পর্য্যন্ত কোন লেখক লোকের দৃষ্টি আকৃষ্ট করতে পারে না। দ্বিজেনবাবু সম্পূর্ণরূপে না হলেও আংশিক ভাবে সে ইন্দ্রজাল থেকে মুক্ত।

গোড়াতেই বলেছি ‘একতারা’ ভাবের গুণে হৃন্দর। কিন্তু ভাবের রূপ কেবল মাননী নয়—শব্দের নির্ব্বাচন ও সংযোজনকে আশ্রয় করেই তা স্ফূর্ত। অতএব কাব্যের ভাষাও দেখা দরকার।

দ্বিজেনবাবুর কবিতার ভাষা খুবই মোটা, খুবই সাদাসিধে—মনে হয় এ পরিচ্ছদ দিয়ে তিনি কোন সাহসে তাঁর বড় বড় ভাবগুলিকে সাজিয়েছেন; কিন্তু ঠিক সংকুলান হয়েছে—বেমানান হয় নি। দ্বিজেনবাবুর হেলাফেলার ভাষা যতই আটপোঁরে হোক—তা নিখুঁত, যতই অসতর্ক হোক—তা অবাধ, ভাবের স্বচ্ছন্দতাকে তা আড়ষ্ট করে ফেলে নি।

নমুনা তুললেই দেখতে পাবেন।

“আইন দিয়ে যতই বাঁধো তুমি  
প্রাণ-সাগরের বিপুল বেলাভূমি  
সহজ মনের যতই রচো কারা,  
নিমেষে সব বাঁধন ফেলে টুটি

গতির স্বখে উধাও যাবে ছুটি  
বে-আইনির হাজার নতুন ধারা।”

ধর্ম্মে বল, সাহিত্যে বল, সমাজে বল, জীবনে বল, এত বড় সত্য আর কি আছে? কিন্তু যতবার পড়ি, আরব্য-উপস্থাসের সেই ধীবরের মতই সন্দেহ হয়—এতটুকু শিশির মধ্যে অত বড় দৈত্য ছিল কি করে? আর একটি উদাহরণ দিই।

বিরহ সম্বন্ধে কবি বলেছেন :—

“যে বেদনা মোর তোমার বিরহে  
সকল ব্যথার সার।  
তুমি বিনে বল সে ব্যথার ব্যথা  
মরমে পশিবে কার ?  
কানে পশে শুধু কথার কাকলী,  
ভাব নেয় ভাব চিনে,  
তোমার অভাবে যে ভাব মরমে  
কে বুঝিবে তোমা বিনে?”

জানিনে, এত সাদা কথায়, চণ্ডীদাস এর চাইতে কি ভাল লিখতে পারতেন।

দ্বিজেনবাবু সম্বন্ধে এ কথাটি বলা যায় যে, প্রাণের তারটি না বেঁধে তিনি গান জাগাতে সাহস করেন নি।

দ্বিজেনবাবুর কবিতায় সত্য-সম্ভ্রতা ছাড়াও এমন একটি সূক্ষ্ম অমুভূতির পরিচয় আছে, যা প্রত্যেক বড় কবির নিজস্ব। যা সকলেই



দেখে, সকলেই শোনে, যা সহজ ইন্দ্রিয়-গ্রাহ্য, তার অতীত কিছু কবির ইন্দ্রিয়ে পৌঁছান চাই; উদাহরণ—

“ও-পার হতে ব্যথা তব এ-পার হতে মম  
আঘাত করি, কাঁপিয়ে তুলে সব  
না পড়ে আর বস্তু চোখে ব্যাধায় লহর সম  
সবই প্রাণে হয় গো অনুভব।”

এই যে অনুভব, এ কখনই প্রাকৃত জনের হতে পারে না। বিরহের ক্লেশ প্রায় সব লোকের ভাগেই ঘটে, কিন্তু বিরহের বেদনার আঘাতে যে ব্যবধানের নদী, ক্ষেত্র, লোকালয় বস্তুহীন ব্যাধার লহর হয়ে দাঁড়ায়, এটা কেবল কবিই অনুভব করতে পারেন।

বিজ্ঞানবাবুর সব অনুভূতিই যে ভাষায় পূর্ণাবয়ব মূর্তি নিয়ে দাঁড়ায়, তা নয়, তবে তাঁর কণ্ঠের অপরিষ্কৃত কাকলীতেও একটা উচ্চ সঙ্গীত প্রকাশের প্রাণপণ প্রয়াস আছে।

কবির বিচিত্র কল্পনাও (fancy) হৃন্দর। প্রথমেই তিনি প্রিয়াকে করেছেন দেউলের দেবী। তীর্থ-বাত্তীর মত ঘুরে ঘুরে যেদিন তিনি দেখতে পেলেন—

“ঐ রাজা পা ছটা

দীর্ঘ পথের মৃগাল শিরে রক্ত কমল ফুটি”

সেদিন তাঁর পথ-চলা ধম্ব হলো; আবার কখনো প্রিয়াকে করেছেন “জীবন পথে পড়ে পাওয়া কুড়িয়ে নেওয়া বাঁশী। পে বাঁশী কবির “আপন হাতে গড়া” নয়, “বাঁশীর হাতে বেছে নেওয়া

নয়, এমন কি তার জন্ম কবিকে কানা কড়াও দিতে হয় নি। কবি ভাবতে পারেন নি যে, তার কিছুমাত্র মূল্য থাকতে পারে। তিনি খেলার ছলে তাকে অধরে ছুঁয়েছিলেন, কিন্তু কি আশ্চর্য্য! “স্বরের ফুলে ভরে ভরে উঠলো বাঁশী মুঞ্জরি”, আর সে যে-সে স্বর নয়, একেবারে “ভুবন ভোলানো” স্বর। কাজেই কবির মনে এই উদার আশা জাগলো—

“সকল আকাশ ভরবে আমি  
তোমার ও স্বর দিয়ে।”

বিজ্ঞানবাবুর চিত্রণ শক্তির পরিচয় দিতে বড় বেশি আয়োজনের প্রয়োজন নেই—ছ’টার ছত্রই যথেষ্ট—

“ফেলিয়ে সকল ভূষা, এলে নিশীথে,  
এলে ধীরে, চুপে চুপে, এলে চকিতে,  
একেবারে বৃকে নিলে, বাহুপাশে জড়াইলে,  
চিরতরে জুড়াইলে চির-জুযিতে।”

একটা গোটা ছবি চোখের সামনে ভেসে উঠল; প্রত্যেক শব্দটির মুখে একটি বর্ণ, একটি রেখা।

যেখানে কবির চিত্র অলঙ্কারের মধ্য দিয়ে প্রস্ফুট, সেখানে তা আরো হৃন্দর, আরো জীবন্ত।

“দেহের কুলের ভাঙ্গন যত,  
মনের কুলে গড়বে তত”



বা

“ছল ছল আঁখির মত পরাণ উঠে উথলি”

অথবা

“তারার আলো নিশার প্রাণের স্বপন সম ভার”

দু-চীনে এমন ছবি ক'জন চিত্রকর আঁকতে পারেন ?

“একতারা”য় এমন একটু দার্শনিক স্ববাস আছে, যা বিশেষ করে ভাবুকদেরই উপভোগ্য। দার্শনিকতার সঙ্গে যে কবিদের একান্ত বিরোধ, একথা আমি অস্বীকার করি। সুকবির হাতে ও-দুই-ই যে রত্নের আকর, তার প্রমাণ বিজেনবাবুই দিয়েছেন। যেখানে তিনি লিখেছেন—

“হাওয়ার যে বীজ উড়ে এসে লাগে মনের উপর দেশে  
তার সে ক্ষণিক ফুলের নেশায় পরাণ আমার ভুলবে না,  
প্রাণের গোপন গভীর তলে রসের চির ধারা চলে  
সেখায় যদি না রহে মূল স্থধার ফল যে ফলবে না।”

সেখানে বুঝতে পারি না তাঁর জ্ঞানকে কি কবিত্বকে বেশি প্রাধান্য করবো।

“মুকুল ছুটে যে পথ দিয়ে সমুখ পানে ফলের মাঝে  
আমার এ স্বর ধরিয়ে দিতে চায় গো তা যে,  
পিছন সনে সমুখের ভাই সত্য কোথাও বিরোধ নাই  
একই বাঁশীর স্বরটা সবার বন্ধে বাজে।”

একটি ঘরের কোণের উপমা দিয়ে কবি সহজ ভাবে বুঝিয়ে দিয়েছেন যে, কালের একটানা স্রোতে যা অতীত তাই বর্তমান; অতীত মরে না, বর্তমানের ভিতর বেঁচে থাকে। নূতন পুরাতনের চিরপ্রসিদ্ধ বিরোধ কেবল ছল দৃষ্টিতে।

বিজেনবাবুর দার্শনিক মতের পরিচয় নিম্নোক্ত ত্রয়োদশ ছাটি থেকেই পুরোপুরি পাওয়া যায়—

“মুক্ত রেখেই ফেললো সে যে বিষম ঘোরে

\* \* \* \*

বাঁধন-স্বজন-নেশায় এ মন উঠল ভরে”

বোঝা গেল কবি freedom-বাদী; বাইরের বন্ধনই তাঁর কাছে একমাত্র বন্ধন—আবার তিনি লিখবেন।

“যেখানে মোর প্রাণের বাঁধন মুক্তি আমার সেইখানে”। বোঝা গেল কবি একজন মস্ত বড় optimist. শৃঙ্খলার শৃঙ্খল তাঁর কাছে মুক্তিপাশ।

আর একটি দার্শনিক কবিতার ছ' ছত্র উদ্ধৃত করবার লোভ সম্বরণ করতে পারছি না—যার ভিতর একটি বড় সত্য ফুটে উঠেছে।

“ভয় ত শুধু আপন মাঝে আপন পরে অবিখাস,  
ভয় ত শুধু মৃত প্রাণের প্রেমের প্রতি পরিহাস।”

বিজেনবাবুর “একতারা” সম্বন্ধে এবং “একতারা”র মধ্য দিয়ে যে কবি মানুষটি ফুটে উঠেছে তার সম্বন্ধে এপর্যন্ত যা বলেছি—তা প্রায়

সমস্তই নিজের একদিকে পড়েছে—এবার অত্মদিকে কি পড়তে পারে দেখা যাক।

“একতারা”র কতকগুলি কবিতা একেবারে ছুঁবেঁধ। কথায় কথায় অর্থ হয়ত করা যেতে পারে কিন্তু তাতে আগাগোড়া একটা স্পষ্টত্ব অনুভব করার একান্ত অভাব। কষ্টকল্পনার সাহায্যে হেঁয়ালির অর্থ করা যাঁদের অভ্যাস আছে তাঁরা কি বলবেন জানি না, কিন্তু সাধারণ পাঠকের কাছে ও-গুলো কুয়াসার মতই ঝাপসা।

দ্বিজেনবাবুর কবিতানন্দরীর দেহও স্থানে স্থানে ছন্দ দোষে ছুঁতে। যদিও সে দোষ তিলের মতই ক্ষুদ্র। তিলকে ভাল করে’ লোকের চোখে ধরে দেওয়া আমি একেবারেই পছন্দ করিনে। কবি অনুসন্ধান করে’ নিজেই সেগুলি বের করে নেবেন এবং চাইকি ইচ্ছা করলে একটা তুলির টানে ভা বেমালাম মুছে ফেলতে পারবেন। আমার বিশ্বাস এ তাঁর অসাবধানতার দোষ, কানের দোষ নয়।

তারপর আর একটি কথা। একটা কবিতা একটা গোটা কাপড়ের মত। সে কাপড়ের খানিকটা সূতি, খানিকটা রেশমী, খানিকটা মোটা, খানিকটা মিহি, খানিকটা সাদা, খানিকটা রঙ্গীন হলে বড়ই দুঃখের কথা। দ্বিজেনবাবুর কবিতার এ দোষটুকু প্রায়ই দেখা যায়। তাঁর দিব্যি রঙ্গীন মিহি কথার পর হয়ত এমন মোটা সাদা কথা এল যে, ইচ্ছে হয়, সেটুকু কেটে ফেলে দিই।

তবে মোটের উপর দ্বিজেনবাবুর ‘একতারা’ এতই সরস, এতই উপাদেয় হয়েছে যে, তাঁর দোষগুলিকেও অপকর্ষক বলতে ইচ্ছা হয় না—এ সম্বন্ধে কবির ভাবতেই আমি নিঃসঙ্কোচে বলতে পারি—

“ফুলের ফ্রেটা নয় গো কাঁটা  
কাঁটাই সফল হয় গো ফুলে।”

এবং আর যেই ভুলুক

“মরম-মধুর সন্ধানীর  
এ কথাটা যায় না ভুলে।”

শ্রীসতীশচন্দ্র ঘটক।



## সাহিত্য ও নীতি ।

—:—

দার্শনিক অদার্শনিক, ধার্মিক অধার্মিক, কবি অকবি—সবাই এ কথা স্বীকার করিবেন যে, মানুষের মধ্যে সব-চেয়ে বড় না হোক, সব-চেয়ে উঁচু আর খাড়া হইয়া আছে যে সত্যটা, সেটা হচ্ছে তার স্বয়ং। আমাদের কাহাকেও মুখের উপর অহংকারী বলিলে আমাদের মধ্যে যে অতিবড় ধার্মিক, তার-ও পক্ষে সেটা ভালমানুষের মত মানিয়া লওয়া যে তত সহজ-সাধ্য হয় না, এই প্রমাণ যে অর্কবীচীন জনসাধারণের চেয়ে তার “অহং” কিছু কম উগ্র নয়। প্রতি নিমেষে সবঙ্গে আমরা একেই লালন করিয়া থাকি, আমাদের সমুদয় জীবনব্যতীত হচ্ছে ইহারই চারিপাশে ঘূর্ণি নাচের একটি ছবি। এমন কি, মেথরদেরও সর্দার আছে। যে ধূলার তলে দলিত বিদলিত হইয়াছে, তার সমস্ত রিক্ততার মধ্যেও মনের এক কোণে ইনি যে জাগিয়া নাই তা কেমন করিয়া বলা যায় ?

অথচ নিজেকে অহর্নিশ মন্দিরচূড়ার মত শৃঙ্খলের মধ্যে খাড়া করিয়া ধরিয়া রাখার জন্ত মানুষের এই যে চিরন্তন দুর্নিবার কোঁক, ইহার চেয়ে কম সত্য নয় মানুষের মধ্যে আর একটি প্রবলতর প্রবণতা, সে হচ্ছে তার নুইয়া পড়ার প্ররতি। মানুষ এ বিশ্বে কাঁকে যে প্রণাম করে নাই তা বলা শক্ত। আকাশের মেঘ, নিশীথের

তার, সমুদ্রের হাওয়া, জঙ্গলের আগুন, বনের সাপ, বানর, বাঘ—শেষে বাস্তব জগতেও সাধ না মেটার দরুণ কল্পনার দেশের ভূত পিশাচ যক্ষ দানব—কার কাছে মানুষ “মাথা, নত” করে নাই? কার্কাইল দেখাইয়াছেন, সমগ্র মানুষের সভ্যতার ইতিহাস হচ্ছে পুনঃপুনঃ সাফাঙ্গ প্রণিপাতের ইতিহাস।

জনসমাজ প্রতীক্ষা করিতেছে, কবে অবতার আসিবেন, তারা অনুসরণ করিবে, সমস্ত মনঃপ্রাণ দিয়া তারা তাঁকে গ্রহণ করিবে, পূজা করিবে। জনসমাজ হচ্ছে একটি অশ্ব, যে ছুটিতে জানে কিন্তু গন্তব্য জানে না—নেপোলিয়ান আসিলে তবুই ফরাসী ঘোড়া তার গন্তব্যে পৌঁছিতে পারে—তাঁর বাহন হইয়া। মানুষের শ্রেষ্ঠ আর্ট হচ্ছে বন্দনার আর্ট। বাদশার ঘোড়াহাতের এক অঞ্জলি ফুল, সে পাথর হইয়া গয়া তা জমহল হইয়া উঠিল। মানবের সমস্ত যুগযুগান্তরের কাব্য-সাহিত্যের গুঞ্জন দূর হইতে দাঁড়াইয়া শুনিতে কেবল এই ধ্বনি শুনিতে পাই—“নমো নমো নমঃ”। মানুষের শ্রেষ্ঠ গান হচ্ছে—“আমার মাথা নত করে দাও হে তোমার চরণ-ধূলার তলে।”

( ২ )

জল যে সমুদয় ভূমণ্ডলে এ ভাবে ওতপ্রোতরূপে সঞ্চারিত হইতে পারিয়াছে, তার কারণই হইতেছে এই যে, “নীচু বিনা উঁচু পথে জল বড় যায় না”। বাইবেল বলেন, “The last shall be first.” আরো বলেন, “পৃথিবীর উত্তরাধিকার তাদেরই—যারা নুইয়া পড়ে, যারা meek.” নমস্কার-ই হচ্ছে সর্বত্র প্রবেশের পথ। আপিশে চুকিবার প্রধান উপায় যে সেলাম, তা কে না জানে ?



ধার্মিকতা যদিও আজকাল দান্তিকতারই নামান্তর, তথাপি গোড়াতে ধর্ম যে এতটা ব্যাপকতা লাভ করিয়াছিল, সম্ভবত তার কারণ, ধর্ম তখন নাত্র ছিল, এবং তাই নর্দদা বা তাদৃশী কোনো নদীর পুলিনেই সে নিলীন ছিল না। কেবলমাত্র বিশেষ কোনো কাননের পথে পথে বেণু বাজাইয়া দেখু চরানো নয়, প্রান্তরুখান থেকে জীবনের সমুদয় কার্যাবলীকে ধর্ম কি প্রকার শুভঙ্করের আর্ঘ্য দ্বারা বিধিবদ্ধ করিয়া দিয়াছিল, তা যে-কোনো পঞ্জিকার পাতা উন্টলেই প্রত্যক্ষ হইবে। এইরূপ যে হইতে পারিয়াছিল, তার কারণ এই যে, তখন ধর্ম ছিল একটি গানের সুর, যা চিরদিন-রজনী মনের মধ্যে গুমরিয়া মরিত—প্রকাশের বেদনায়, এবং তৎকালে বক্তৃতামঞ্চাদি না থাকায় তা অকস্মাৎ আশ্রয়-গিরিড্রাবরূপে উচ্ছ্বসিত হইয়া পড়িবার সুরধোণ না পাইয়া, সমুদয় জীবনকেই একটি ছন্দে পরিণত করিত—ছন্দকে গান থেকে বিযুক্ত করিয়া দেখিলে চিরকালই তা কুটু-কাওয়ারের মত দেখায়। “তব গানের সুরে চিত্ত আমার রাখ হে রাখ ধরে—কছু দিয়ো না তারে ছুটি”—ধর্ম ছিল সেই সুরের মধ্যে বিধৃত চিত্তের একটি “মনোভাব”, একটি attitude, tendency, একটি spirit—দেয়ালে টাঙান একটি motto মাত্র নয়। যাকে ইংরাজিতে বলা যায় “leavening of the bread”—ধর্ম সেই-রূপ সমস্ত জীবনের মধ্যে সঞ্চারিত হইয়া গিয়াছিল।

( ৩ )

সর্ব-সংক্রামকতা, সর্ব-সঞ্চারিতা ও সর্বগতা পর্যায় শব্দ হইতে পারে, সর্বগতা কিন্তু সর্বপ্রাসিতা নয়। সমস্ত ভূতে যিনি আপনাকে

দেখেন, এবং আপনাতে সমস্ত ভূতদের দেখিতে পান তিনি সর্বগ, কেননা তিনি সর্বত্র গমন করেন—অব্যাহত তার প্রবেশ—“যেথায় তোমার লুট হতেছে ভুবনে, সেইখানে মোর চিত্ত যাবে কেমনে—সোনার ঘটে সূর্য্য তার নিচ্ছে ভুলে আলোর ধারা, অনন্ত প্রাণ ছড়িয়ে পড়ে গগনে”—তিনিও সেইখানে তাঁর রূপার ঘট লইয়া হাজির। তিনি নিজের চৈতন্যকে দিগ্বিদিকে প্রেরণ করিয়াছেন—সমুদ্র যেমন মেঘদের প্রেরণ করে—মেঘ যেমন বিন্দুদের প্রেরণ করে—তাগের দ্বারা, অহিংসার দ্বারা—তাঁর সাধনা গ্রাস করিবার সাধনা নয়। “Blessed are the meek, for they shall inherit the earth”—একটু একটু করিয়া annex করিয়া নয়, একেবারে চক্ষু মেলিয়াই সে দেখিতে পাইল সমস্ত ভুবন তারই জগৎ।

ধর্মের ব্যাপিকতা যখন সর্ব-প্রাসিতার রূপ ধারণ করিল তখন সে রাজদণ্ড হাতে লইল, পোপ হইল, ভ্রাঙ্কণ হইল। লুণ্ঠনের প্রয়োজন হইল, বুদ্ধ আসিল।

( ৪ )

ধর্ম এক সময়ে বিজ্ঞানের ক্ষেত্রেও অনধিকার প্রবেশ করিয়াছিল। সেই জগৎই যেমন বাইবেল তেমন আমাদের পুরাণগুলিতেও দেখিতে পাই, যন্ত্রিতন্ত্র থেকে সমস্ত প্রাকৃতিক ঘটনাবলীর কারণ নির্ণয় ও ব্যাখ্যার একটা প্রকাণ্ড প্রচেষ্টা। বাস্তবিক একটু ক্রান্ত হইয়াছিলেন বলিয়া বা এক সপ্তাহ পূর্বে আমাদের ঐ পুরুষটা আমাদের গকে কি রকম সাধু বাঙলার উচ্ছ্বাসের কতকগুলি উপকরণ জুটাইয়াছিল, তা'ত আমাদের

সকলেরই মনে আছে—অর্থাৎ “মন্তবিধূনিত উত্তাল বিক্ষুব্ধ তরঙ্গ” ইত্যাদি। ইংলাণ্ডে এই অনধিকার-প্রবেশ কি-রকম গলাধাক্ক খাইয়াছে ও-দেশের সাহিত্যে তার ফোটাটা রহিয়া গিয়াছে।

( ৫ )

সাহিত্যক্ষেত্রে আর্টের সঙ্গে ধর্ম ও নীতির বিবাদটি অপ্রসিদ্ধ নয়—এবং সাহিত্য আর যাই হোক বিজ্ঞান নয়—যদিও বিজ্ঞান সাহিত্য কিনা সে-সম্বন্ধে তর্ক আছে! সাহিত্য হচ্ছে আর্ট, আর এ-সম্বন্ধে যে দল যাই বলুক, সাহিত্য হচ্ছে সর্ব্বত্র আর্ট। বিজ্ঞানের সঙ্গে আর্টের তফাৎই এই যে বিজ্ঞান বলিয়া দেয় আর আর্ট বানায়—এবং আর যে আর্ট বা বানাক, সাহিত্য বা বানায় তা হচ্ছে “মানুষ” এবং প্রকৃতির এই “fair defect” টি-ই নাকি আবার সৃষ্টির মধ্যে noblest thing. তারপর, অল্প সকল আর্টিস্টের মালমসলা জড়—রং, পাথর, কাগড়, বড়-জোর বায়ু তরঙ্গ। আর সাহিত্যিকের কারবার হচ্ছে শব্দ লইয়া, আর শব্দ পদার্থটা আর কিছুই নয়—আইডিয়া-বাস্পের জমাট টুকরা। অল্প অল্প আর্টের মত মানুষের চক্ষু এবং শ্রোত্রকে সাহিত্য কিছুই যে আনন্দ দেয় না, তা নয়; কিন্তু সে গৌণভাবে। সাহিত্য হচ্ছে মনের সঙ্গে মনের সৌজাত্যজি আলাপ—যথাসম্ভব ইন্দ্রিয়কে পিছনে রাখিয়া। আর এই মনই হচ্ছে মানুষের মধ্যে স্বর্গ থেকে চুরি-করা বহিঃস্থলিঙ্গ। ম্যাথু আর্গল্ড্ কাব্যকে “Criticism of life” বলিয়াছিলেন। যদিও সমালোচনা বলিতে আমরা বুঝি সমুদয় ভালকে যথাসম্ভব মন্দ অর্থে ব্যাখ্যা করিয়া মন্দটাকে উজ্জ্বল করিয়া তোলা,

উক্ত অধাশ্মিক ও বৈধাশ্মিক দেশের অধিবাসীটি কিন্তু ও-শব্দের অর্থ বুঝেন ঠিক উল্টা। জীবনের মধ্যে অনেক কুৎসিত ব্যাপার আছে—যেমন এই মুহূর্ত্তে আমাদের এই শরীরের মধ্যে এমন সব ব্যাপার চলিতেছে, যা অতি নক্সাজনক অথচ অপরিহার্য, তেমনি জীবনের কদর্য অংশ মানুষের প্রকৃতির মধ্যে শিকড় গাড়িয়া আছে। তারও একটা সৌন্দর্য্য যে নাই তা নয়—পরিপাক-ক্রিয়ার ইতিহাস পর্য্যালোচনা হয়ত উপভোগ্য। মহিষ-বলির পরে রক্ত মাখিয়া যে নৃত্য, তার বীভৎসতাও ত মানুষে উপভোগ করিয়াছে। তেমনি বায়রণ প্রভৃতি কবি জীবনের যে অংশকে অনাবৃত্ত করিয়াছেন, তারও একটা মাহনীয়তা আছে, বরঞ্চ অনেকের কাছে তার আকর্ষণ অতি প্রচণ্ড। কিন্তু সাহিত্যের কার্য্য তা নয়, তার কাজ জীবনের মধ্যে যা কিছু সুন্দর, যা শান্ত, যা সত্য, যা মঙ্গল, তারই জয়গান করা, তাই সমুখে আনিয়া ধরা। সাহিত্যিক ম্যাক্বেথের দুরাভিচারী বীভৎসতাও আমাদের দেখান, কিন্তু তা কেবল তার থেকে আমরা দূরে থাকিব বলিয়া। অথচ, সৌজাত্য নীতিকথা প্রচার সাহিত্যের কার্য্য নয়। সাহিত্য আর যাই হোক ইঙ্গুলমাষ্টার নয়। পঞ্চতন্ত্র, হিতোপদেশ, ঈশপের গল্প আর কথামালা বই বটে কিন্তু সাহিত্য নয়। এইখানেই সাহিত্যের সঙ্গে ধর্মের সাদৃশ্য, সারূপ্য ও সায়ুজ্য। সাহিত্য এবং ধর্মের মধ্যে মালোক্য নাই এইজন্য যে, যদিও তারা একই কার্য্য করে, তবু আলাদা “লোক” অর্থাৎ ক্ষেত্র হইতে। ধর্ম হচ্ছে একটা বৈদ্যাতিক শক্তি, যা সমুদয় জীবনের মর্ম্মস্থলটিকে এক নিমেষে স্পর্শ করিয়া এমনি ধাক্কা দেয় যে, তার পর থেকে সেই মানুষই হয় আলাদা মানুষ। তার পর থেকে কি করা উচিত অমুচিত তার জ্ঞান আর



তাকে দ্বিতীয় ভাগ ও কপিবুকের নীতিমালা অধ্যয়ন করিতে হয় না। সমস্ত দুর্নীতি সমস্ত মন্দের মূলোচ্ছেদ হইয়াছে তার মনে, আর নীতির কুঠার দিয়া প্রতিদিন পাপের ডালপালার ছেদন করিতে হইবে না। ক্রাফলিনের মতো রুটিন করিয়া এ সপ্তাহে মিথ্যা, ও সপ্তাহে চুরি, তার পরের সপ্তাহে বাচালতার সঙ্গে সংগ্রাম করিয়া মরিতে হইবে না। সাহিত্যও শিক্ষা দেয় কিন্তু আনন্দের মধ্য দিয়া। আসলে, আনন্দিত করাই সাহিত্যের মুখ্য উদ্দেশ্য, আর মানুষকে আনন্দিত করা হচ্ছে তাকে প্রকৃতির করা—আর সাহিত্যিক মানব-প্রকৃতির উপরে বিশ্বাসবান।

( ৬ )

কাব্য এবং ধর্ম সহোদর ভাই। কেননা একই জায়গায় তাদের উৎপত্তি। সমস্ত বিশ্বত্রফাণ্ডের অনির্বচনীয় রহস্যের কাছে মানুষের বলবৃদ্ধি হারিয়া গিয়া বলিল, “নমোনমঃ”, তাইত বেদগান। বিশ্বের নিয়ম দুর্লভ্য, মানুষকে তার অধীন হইতেই হইবে নইলে “মহদন্তঃ বস্ত্রমুক্তম্”—এই ত Old Testament. সমস্ত জীবনের ঘরা উচ্চারণ করিতে হইবে এই মন্ত্র—“নমোনমঃ”—সমস্ত বিশ্বভুবন ত দিনরাত এই মন্ত্র জপ করিতেছেই—ররি শশী গ্রহ তারা ত মহাশুণ্ডে জপ মালা ঘুরাইয়া চলিয়াছেই—এই চারদিকের আকাশে বাতাসে প্রত্যেকটি অণুপরমাণু অমোঘ নিয়মকে এই মুহূর্ত্তে মানিয়া ত চলিতেছেই, মেঘের ছুটিগাছে, বায়ু ছুটিগাছে—মহাশাসনে বাধ্য হইয়া, কেবল মানুষের ইচ্ছা সে স্বাধীন, সে খুসি হইলেই এই নিয়মের প্রতিকূলেও

চিনতে পারে—তাইত তার এই নমস্কার-সম্প্রাত বিশ্বভুবনের আর সকল সঙ্গীতকে ছাপাইয়া উঠিল—সমস্ত জীবনের নমস্কার, একটি চিন্তা মনে উঠিবে না, কখনো কোনো মুহূর্ত্তে যা এই বিশ্বসঙ্গীতের সঙ্গী বিসংবাদী, ইহাই নীতি।

ফিলসফি কাব্যের বোন হইতে পারে, কিন্তু বৈমাত্র। কেননা এই বিশ্বের নিবিড় রহস্যকে উদ্ঘাটন করিবার প্রবৃত্তি দর্শনের জননী—কাব্য কেবল বলে “যা দেখেছি তুলনা তার নাই”। তুচ্ছতম যা ঘটনা, প্রতিদিনের যা দৃশ্য, সাধারণতম মানুষ, ক্ষুদ্রতম ফুল—তারও রহস্য অপার। ওয়ার্ডসওয়ার্থ তাই ঘাসের মধ্যে Celandine-কে আবিষ্কার করিয়া বলিলেন, জ্যোতির্বিদ্রা নক্ষত্র আবিষ্কার-করুক, আমি তোমাকে আবিষ্কার করিয়াছি, এই আমার গৌরব।

( ৭ )

সাহিত্য হচ্ছে একখানি দর্পণ, যার আশ্রয়ে নরসমাজ পুনঃপুনঃ আপনার মুখ প্রসাধন করিয়াছে, যা কুৎসিত তাকে দূর করিয়াছে। “Uncle Tome’s Cabin”—নীগ্রোদের প্রতি খেতাঙ্গদের ব্যবহার সম্বন্ধে খেতাঙ্গদের চৈতন্য জন্মাইয়াছিল। রশোর লেখাগুলি করাসীদেরকে তাদের কৃত্রিম সমাজের কদর্ঘতা সম্বন্ধে সচেতন করিয়া দেওয়ার পর যা যা ঘটয়াছিল তা কে না জানে? আমাদের দেশে বর্তমান মুহূর্ত্তে শরৎ চট্টোপাধ্যায়ের গল্পগুলি আমাদের নারীদের অসীম ছংগদৃষ্টির চিত্র আঁকিয়া যুবকদের মধ্যে নারীজাতির প্রতি তাদের মনোভাবের অসীম প্রভাব বিস্তার করিতেছে বলিয়া মনে হয়।



কিন্তু কেবলমাত্র দর্পণের উদ্ভূত করিবার ক্ষমতা নাই। দ্বিজেন্দ্রলালের ব্যঙ্গ-কবিতাগুলি দর্পণ হইতে পারে, কিন্তু অশ্রু গানগুলি ওর্পণের মন্ত্র। আর, তারা এই দেশের মনের উশর কি কার্য করিয়াছে তা মাণিবার সময় আজও উপস্থিত হয় নাই।

সেই দর্পণের মধ্যে প্রতিবিম্বিত হইয়াছে—মানুষের হৃদয়ের কত কত আশা ভরসা, লজ্জা দৈহ্য, যুগ বিরক্তি, অবসাদ নিরাশা, বিষয় ক্রোধ, ভালবাসা ভক্তি। কিছুই বাদ যায় নাই, মানুষ ত পূর্ণ নয়, তার শত বিফলতা, শত অকৃতার্থতা, শত জঘন্যতা সহস্র গান। সাহিত্যকে তার সাফ্য বহন করিতে হইতেছে। এ যেন একখানা “অদ্বৈতবাদী”র জগৎ—“সর্বত্র শব্দই ব্রহ্ম”—যেখানে বা আছে—যতকিছু পঙ্খিলতা, যতকিছু পাপ, সমস্তকে লইয়া অগ্রসর হইতেছে এই জগৎ। স্থান আছে—সকলের জন্মই স্থান আছে। কেবল ফুলের গন্ধে আর মলয় বাতাসে আর জ্যোৎস্নায় ভর্তি একখানি কল্পলোক নয়—ঘরে ঘরে বেদনার রাশ, নিখিলের ব্যথা, দিকে দিকে পুঞ্জ পুঞ্জ ভারে ভারে স্তূপীকৃত—মাতার প্রতি সন্তানের দুর্ব্যবহার, প্রেমের শূন্য গর্ভতা, দরিদ্রের ক্রন্দন—Les Miserables, এ সমস্তকে পান করিয়াছে যে সাহিত্য তারই হাতে দুর্ভয় ভৈরব পিনাক। তারই বিকট জটাজুটের মধ্যে অশ্রুত প্রবাহিনী।

( ৮ )

কিন্তু জীবনের মধ্যে যা আছে, সবছ তার ছবি তোলা ফোটো-গ্রাফারের কাজ হইতে পারে, সাহিত্যিকের নয়। সাহিত্য জীবনের ছায়াচিত্র নয়, ভাবচিত্র। কোকিলের ডাকের নকল করিতে

পারে আমাদের হরবোলা, কিন্তু হরবোলা আমাদের যা দেয়, তা হচ্ছে কোকিলের ডাকের দেহখানি—কোকিলের ডাকের মর্শ্গত যা বাণী, যা কুলুতানের অন্তর্ভুক্তিকাধিপ্তিত বিদেহ আত্মা, যা যুগে যুগে কত গৃহে, গণ্ডে পথে, কত কান্তারে নিখিলের মনের ব্যাথাকে দেহ-দান করিয়াছে—তা আমরা হরবোলার নকলের মধ্যে পাই না, তা পাই কবির কাব্যে। কবি বলেন, “আমার চিত্তে তোমার সৃষ্টিকানি, রাখা তুলিছে বিচিত্র এক বাণী”। বাহিরের এই বিশ্ব কবির চিত্ত-বীণার তারে তারে যা দিতেছে—তার থেকে আমরা পাইতেছি এক অপরূপ সঙ্গীত। কোন কোনও ব্যক্তি যে কাব্যখানিকে “that Epic of Realism”—“বস্ত্তজ্ঞতার মহাকাব্য” বলেন, বায়রণের সেই “Don Juan”—এর মধ্যে আমরা পাই নরনারীর যৌন-সম্বন্ধের অস্থিরতার একটি বিচিত্র বাস্তব চিত্র। পড়িয়া আমরা বলি, হাঁ ঠিক, সমস্ত সামাজিক ভ্রষ্টতা, পারিবারিক বন্ধন, ধর্ম্মনৈতিক বিধি-বিধানের তলে তলে সর্বত্র ইহাই ত ঘটিতেছে—এ-সব কে না জানে?—ইহা হইতেছে সংসারের একখানি জল-জীয়াস্ত ফোটোগ্রাফ। ফোটোগ্রাফ হিসাবে ইহা উপভোগ্য। কিন্তু ইহার মধ্যে হৃদয়ের লাল রঙ কই? একটি মানুষের জন্ম আর একটি মানুষের যে ক্ষুধা ইহা ত সনাতন সত্য। কিন্তু সেই ক্ষুধার সমস্ত প্রচণ্ডতা সত্ত্বেও একটি মানুষ যে আর একটি মানুষের সমগ্র অস্তিত্বকে আপন অস্তিত্বের অন্তর্ভুক্ত, আত্মসাৎ—করিবার প্রয়াসে বিফলকাম হয়—এমার্সনের ভাষায় Marriage ( in what is called the spiritual world ) is impossible—সমস্ত মানবীয় সম্বন্ধগুলি যে কেবল বাহিরের একটা সংবর্ধ-মাত্র—নিকটতম হৃদয়টি যে লক্ষ যোজন দূর—এই যে একটি সত্য ইহা কি

বর্ণ-গন্ধ-স্বাদহীন একটি তথ্য মাত্র? ইহার কি কোনও “রস” নাই? ইহা কি কেবলই রঙ্গ-রসের রহস্যের ব্যাপার, ইহার মধ্যে কি এই বিশ্বের এবং জীবনের আর একটি রহস্যের নিবিড়তা নাই?

অর্জুন যেমন তাঁর স্ত্রীক্ষণ সায়কের দ্বারা পৃথীকে দীর্ণ করিয়া অতল হইতে রসের উৎসকে উৎসায়িত করিয়া পিপাসু মৃত্যু শয্যাশায়ী ভায়কে তর্পণ করিয়াছিলেন, আর্টিষ্টের হাতে তেমনি এই সত্যটি হচ্ছে একটি শর, বা নিখিলেশের মর্সকে ভেদ করিয়া থাকিতে পারে, কিন্তু পিপাসু, আমাদের জন্ম নিখিলেশের জীবন হইতে বাহির করিয়াছে সেই সুখ বা ক্ষতবিক্ষতচিত্ত গ্রানিক্লাস্ত মানবের জন্ম অতি-দুঃখিত এক সঞ্জীবনী। নিখিলেশের সঙ্গে আমরাও জীবন এবং মৃত্যুর রহস্যকে নমস্কার করি—যে “দুঃস্বপ্ন” কোথা হ’তে এসে জীবনে বাধায় “গুণ্ণগোল”, তার থেকে অদ্বুত ব্যাখার মধ্যে জাগিয়া উঠিয়া আমরা নিখিলেশের সঙ্গে দেখিতে পাই যাকে নিবিড় করিয়া ধরা গিয়াছে সে আয়না-মাত্র—সে আয়না বাঁকা বা ভাঙা আয়না হইলে তার সেই বক্রত্ব বা ভগ্নত্বই একান্তভাবে আমাদের গিকে পীড়িত করিবার কারণ হওয়া ঠিক নয়—সে আয়নার যাকে প্রতিফলিত করার কথা ছিল, তাকে পূর্ণ করিয়া বিস্তৃত করার ব্যর্থতাই বেদনার জননী।

সে বেদনা সমস্ত বিশ্বেরই বেদনা—সে “অতি নিবিড় বেদনা বন-মাঝে রে, আজি পল্লবে পল্লবে রাজে রে”, সে ব্যথাই ত “সারানিশি ধরি তারায় তারায় অনিমেব চোখে নীরবে দাঁড়ায়”। সমস্ত জড়জগতের যে হুবিপুল ব্যর্থতা—চৈতন্যকে স্পাক্ত করিবার, মুক্তিমান করিবার বিফলতা—সে সম্বন্ধে জড় ত নিজে চেতনানাহীন। তবু “বাতাস আসে হে মহারাজ গন্ধ তোমার মেখে”—মহারাজ নাই

গন্ধ আছে। অস্তিরতার আঘাত জড় চিন্তের মধ্যে যে ব্যথা দান করে, সেই ব্যথা নিজেকে জানে না, সে চেতনানাহীন। তবু “হৃদয়ের পারের হৃদয়ের হাওয়াই” অপেক্ষা করিতেছে স্নিগ্ধ হাত ব্লাইবার জন্ম সে ক্ষতের উপরে।

( ৯ )

এই জীবনের “তুষার পরে ভুখার পরে” “শ্রাবণের ধারা” বরিয়া গড়িবার জন্ম “নিশিদিন” উম্মুখে। “এই জীবনেই জন্মজন্মান্তর” ঘটাতে পারেন যিনি তিনি “সুন্দর”। সুন্দরের দৃষ্টি হচ্ছে সমগ্রের দৃষ্টি—সমগ্র হইতে ছিন্ন যে খণ্ড সে কদর্য। জীবনের সমস্ত খণ্ড ঘটনা, সমস্ত ছোটখাট কাজ, সমস্ত ব্যবহারকে জীবনের সমগ্রতার সঙ্গে সুসমঞ্জস করা, বেধাপ হইতে না দেওয়া, তালভঙ্গ হইতে না দেওয়া—ইহাই নীতি। সঙ্গীম জীবনের উপরে অনন্তের আত্মনা—ইহাই ধর্ম। মৃত্যুর দ্বারা অখণ্ডিত চির-প্রবহমান যে জীবনধারা তারই কুলনাদ ধর্ম। কবরের পরে কি হবে, এই চিন্তাই ত ধর্মের জননী। “ধর্মঃ সর্বেষাং ভূতানাং মধু”—ধর্ম হচ্ছে মধু, এবং মধু হচ্ছে এমন এক পদার্থ যে, ইন্দ্রিয়গ্রামকে সমগ্রভাবে অভিভূত করে। আলাদা আলাদা করিয়া সা-রে-গা-মা চৈতাইলে তা কীদূশ উৎকট, হার্মো-নিয়াম-শিক্ষার্থীর কল্যাণে তা কার্য অবিদিত নাই। নীতিকথা সেই কারণেই উৎকট। Didactic কবিতা সর্বদেবেই কীদূশ অনাদৃত তা কার্য অবিদিত? মাথু আর্গল্ড, বলিয়াছিলেন, ওয়ার্ডসোয়ার্থের “bags & baggages” কেড়ে নিলেই তবে আমরা প্রকৃত ওয়ার্ড-সোয়ার্থকে পাব।

শ্রীযতীন্দ্রনাথ বসু।



## অবরোধের কথা ।

—:~:—

চোখে-দেখা যে খুন সে-খুনের আসামীরও নিজ গন্ধ সমর্থনের জগু কিছু-না-কিছু বলবার থাকে—সুতরাং অবরোধ প্রথার স্বপক্ষেও যে কিছু বলবার আছে, তা আইন আদালত সম্বন্ধে যাদের কিছুমাত্র জ্ঞান আছে তাঁরাই স্বীকার করবেন। অবরোধটাকে খুনি আসামী বলে' মানলেও, অবশ্য চোখে দেখা খুন নয়। এ-খুন হচ্ছে আধ্যাত্মিক মেথডে। অবশুষ্ঠনের অন্তরালে আধ্যাত্মিক মেথডে যে হত্যা তা চোখে দেখা যায় না। এমন কি হাজার করা ন'শ নিরনব্বই "কেসে" যে মরে, সে নিজেই বুকে উঠতে পারে না যে, সে মরছে। সুতরাং পদ্দা বিরোধী যারা তাঁরা অবরোধ প্রথার বিরুদ্ধে যে-সব অভিযোগ আনেন, সে-সব অভিযোগের বিরুদ্ধে আমি ওকালতি করবার চেষ্টা করব।

( ২ )

অবরোধ প্রথার বিপক্ষ দল অবরোধের বিরুদ্ধে যে-সব অভিযোগ আনেন, সে-সব অভিযোগ থেকে সকল প্রকারের অলঙ্কার, কবিত্ব, যুক্তিতর্ক, মনস্তত্ত্ব, নৃত্য ইত্যাদি সকল রকমের বাহুল্য বর্জন করে' তার একটা চূড়াক করলে যা দাঁড়ায় সেটা হচ্ছে এই, প্রথমত—

এই অবরোধ প্রথার মধ্যে বঙ্গীয় মহিলারা অত্যন্ত কষ্টে কাল যাপন করেন; দ্বিতীয়ত—সমাজে স্ত্রী-জাতির অবরোধ সমগ্র সমাজের পক্ষে অকল্যাণকর। এই দু'টি সিদ্ধান্ত কতদূর ঠিক তা আমাদের দেখতে হবে।

আমরা আজ সবাই দেশচর্যায় তৃতী সুতরাং সমাজের দিক থেকেই জিনিসটাকে আগে দেখব—কেননা ব্যক্তির চাইতে সমাজই হচ্ছে সকলের মতে দেশের বৃহত্তর রূপ। সিদ্ধান্তটা হচ্ছে যে, অবরোধ প্রথাটা সমাজের পক্ষে অকল্যাণকর। কিন্তু আমাদের জাতীয় ও সামাজিক দুর্গতির জগু অবরোধ প্রথা যে কতদূর দায়ী, সে বিষয়ে কারও কোনও স্পষ্ট ধারণা আছে বলেত আমার মনে হয় না।

সুতরাং আমরা দ্বিতীয় প্রস্তাবটির প্রতি নজর দেব। সেটা হচ্ছে এই যে, অস্তঃপুরবাসিনী বঙ্গমহিলারা অত্যন্ত কষ্টে কাল যাপন করে' থাকেন। দেখতে হবে কথাটা কতদূর সত্য।

ইতর প্রাণী ও মানুষের মধ্যে মস্ত একটা প্রভেদ দাঁড়িয়েছে। ইতর প্রাণীর মধ্যে instinct প্রবল; মানুষ—কি পুরুষ কি স্ত্রী—instinct-কে ছাড়িয়ে উঠেছে। কথাটা বাঙলা করে' বললে এই দাঁড়ায় যে, ইতর প্রাণীর মধ্যে প্রকৃতি একাধিপত্য করছে; কিন্তু মানুষের মধ্যে পুরুষ আপনাদের সন্ধান পেয়েছে—এবং সে প্রকৃতির উপরে আপনাদের আধিপত্য স্থাপন করবার জগু প্রকৃতির সঙ্গে সংগ্রাম করছে। সে যে প্রকৃতিকে সম্পূর্ণ বশীভূত করতে পেরেছে তা নয়, তবে মানুষ আর পশু নেই। মানবের মধ্যে পুরুষ আপনাদের সন্ধান পেয়েছে বলে', আপনাদের অধিকার, আপনাদের রহস্য জেনেছে বলে' মানবের স্বাধীনতাও বেড়েছে, তার স্থখ দুঃখের ফরমুলা বদলেছে,



তার আশা আকাঙ্ক্ষার চেহারার পরিবর্তন হয়েছে, তার সমস্ত জীবনের ভূমিমাটাই একটা নুতন ছাঁচে গড়ে উঠছে।

মানবের মধ্যে পুরুষ জাগ্রত হয়েছে বলে' পুরুষ নারীর মধ্যে পরিবর্তন ঘটছে—সেই পুরুষের ইচ্ছা শক্তির জোরে। প্রকৃতি হচ্ছে জ্ঞানহীনা। সে পুনরুক্তি ছাড়া, একই জিনিসকে, একই বিষয়কে বার বার একই ভাবে সৃষ্টি করা ছাড়া, আর কিছু পারে না। সেই জন্তু দেখি যেখানে পুরুষের আবির্ভাব হয় নি সেখানে প্রকৃতির একই রূপ। 'বৈদিক যুগের গরুটা থেকে আজকার গরুটার কিছুই প্রভেদ নাই। শিশু শিশুকে পিঠে করে' যে গাধাটা ঈজিপ্টে পৌঁছিয়েছিল, সেটার সঙ্গে আমাদের অতি সাধারণ ধোঁপার গাধাটার কোনই অমিল নেই। তেমনি সকল প্রকার ইতর প্রাণী উদ্ভিদ ইত্যাদির কোনই পরিবর্তন নেই। পাঁচ হাজার বছর আগে শাল্মলী তরুটা ঠিক যে ভাবে যে অবস্থার ভিতর দিয়ে যে নিয়মে গড়ে উঠেছে—আজকার শাল্মলী তরুটাও তাই। যে বট গাছটার তলায় শাক্যসিংহ বুদ্ধত্ব প্রাপ্ত হলেন সেটাও যা—আর আজকার যে বট গাছটার তলায় পানওয়ারী পানের ষিলি বেচ্ছে, ফৌজদারী মোকদ্দমার সাক্ষীর তামাক খাচ্ছে—সেটাও তাই। কিন্তু এক মানুষের সম্বন্ধেই তা খাটে না। কারণ মানুষের মধ্যে পুরুষের আবির্ভাব হয়েছে, আর এই পুরুষের ইচ্ছা শক্তি বা Will বলে' একটা সম্পদ আছে।

আর সেই জন্মেই মানুষের—কি পুরুষ কি নারী—স্বত্ব দুঃখ শুধু একটা বাহিরের ধরাবাঁধা অবস্থা বিশেষে নয়, সেটা তার অন্তরের ইচ্ছার সার্থকতা বা ব্যর্থতা। মানুষের স্বত্ব দুঃখ সম্পূর্ণ

subjective, একটা গরুর স্বথের অবস্থাও যা, দশটা গরুর স্বথের অবস্থাও তাই, দশ-যুগের গরুর স্বথের অবস্থাও তাই। কিন্তু মানুষের স্বত্ব তখনই, যখন তার অন্তরের অবস্থা বা মনের বাসনার সঙ্গে বাহিরের অবস্থা খাপ খায়।

উপরে যে কথাগুলো বলা গেল, আশা করি এ সম্বন্ধে সবাই আমার সঙ্গে একমত হবেন।

এখন একটা জিনিস নির্ধারণ করতে চেষ্টা করুব, সেটা হচ্ছে অবরোধ প্রথাটা বাঙলায় এল কি করে'। কিন্তু কেউ যেন মনে না করেন যে, আমি একটা বিজ্ঞান-সম্মত ঐতিহাসিক গবেষণা বা অনুসন্ধান করতে যাচ্ছি—আমার এ অনুসন্ধানের আশ্রয় হচ্ছে অনুমানখণ্ড ইংরেজিতে যাকে বলে—guess-work। এই guess-work এখানে করতে যাচ্ছি এই সাহসে যে, তার শিক্ষাস্ত যদি ডাছা ভুলও হয়, তবে এই প্রবন্ধের মূল কথাই কিছুই আসবে যাবে না।

বাঙলাদেশে আজকাল ছ'রকমের লোক দেখা যায়। এক দলকে সেই দাঁড়কাকের সঙ্গে তুলনা করা যায়, যে দাঁড়কাক ময়ূরপুচ্ছে লাগিয়েছিল। কারণ তার ধারণা ছিল যে, গায়ে ময়ূরপুচ্ছে লাগালেই সে হুন্দর হ'য়ে উঠবে। এই দলের মানুষও তেমনি বলে' বেড়ান যে, আমরা হচ্ছে আর্ধ্য সন্তান। তাঁদের মনের ভাবটা যে, আমরা আর্ধ্য-সন্তান প্রতিপন্ন হ'লে বর্তমান "আমাদের" মহত্বটাও বিনা ক্লেশে বিনা আয়াসে বেড়ে যাবে। তাই যখন এঁরা শোনেন কেউ বলছে যে, আমাদের শিরায় মঙ্গোলীয় বা ড্রাবিড় শোণিত আছে, তখন তাঁরা বেজায় খাপ্লা হ'য়ে ওঠেন। অম্বদল এ সবকে কিছুই কেয়ার করেন না। তাঁরা বলেন যে, থাকলেই বা

আমাদের শিরায় ড্রাবিড় বা মঙ্গোলীয় শোণিত, আমাদের যা মহত্ব তা কাগজে কলমে দেখালে চলবে না, দেখাতে হবে তা হাতে কলমে। অতীতকে নিয়েই খালি হৈ চৈ করলে নিজেদের সুখ হ'তে পারে কিন্তু অপরের তাতে ভুল হবে না। কিন্তু বাহোক্ এঁদের এই বাদামুখাদের কোন বিচার আমরা করব না—বিশেষত আমরা যখন নৃতত্ত্ববিদ নই। এঁদের ছুঁদলের মনস্তত্ত্বের জন্মে ধরে নেওয়া যাক, বাঙালীর মধ্যে ও-তিন জাতের রক্তই আছে—আর্যেরও, মঙ্গোলেরও ড্রাবিড়েরও। এবং এ-কথাটা সত্য হবারও একটা সম্ভাবনা আছে। কেননা ভারতবর্ষের সকল জাতির মধ্যে বাঙালীর যেমন একটা adaptability আছে—আপনাকে পরিবর্তিত হ'তে দেবার পক্ষে যেমন একটা অসঙ্কোচ ভাব আছে, এমন আর কারও নেই। আর মিশ্র রক্তেরই যে এ রকম চরিত্র হ'য়ে থাকে, এটা নৃতত্ত্ব নিয়ে যঁরা মাথা ঘামান তাঁদের মুখে শুনতে পাওয়া যায়। কিন্তু এই যে অবরোধ প্রথা, তা আর্যদের ছিল না; মঙ্গোলীয়দেরও নেই, ড্রাবিড়দেরও নেই। স্তত্ররং বাঙালী তা পেল কোথা থেকে? এ প্রশ্নে স্ভাবতই একটা উত্তর এসে পড়ে, সেটা হচ্ছে—মুসলমানদের কাছ থেকে।

এ সম্বন্ধে বাঙলাদেশে একটা প্রচলিত মত আছে সেটা হচ্ছে এই যে, মুসলমানরা বঙ্গীয়-ললনার উপরে অত্যাচার করত, তারই ফল হচ্ছে অবরোধ। কিন্তু অবরোধের এই কারণটা সত্য নয় বলেই মনে করি। কেন করি—তার কারণ বলছি।

একথা আমরা সবাই জানি যে, বাঙলাদেশে মুসলমানদের আমলে সমস্ত দেশটা প্রত্যক্ষ ভাবে হাতে ছিল হিন্দুদের। মুসলমান নবাব বছর বছর নিয়মমত রাজস্ব পেলেই তুষ্ট থাকতেন। কিন্তু দেশের

আভ্যন্তরিক শাসনের ভার ছিল হিন্দু-জমিদার বা রাজাদের হাতে। শাসন ও পালনের ভার প্রত্যক্ষ ভাবে ছিল তাঁদেরই হাতে। স্তত্ররং সেই হিন্দু-জমিদার বা রাজাদের এলাকায় মুসলমানেরা হিন্দু-ললনার প্রতি অত্যাচার আরম্ভ করল আর সমস্ত হিন্দুরা জোট বেঁধে তার প্রতিকার করলে বাঙলার সমস্ত নারী সমাজকে একদিন অস্ত্রপুণ্ডরে অন্তরীণ করল, এটা মানতে মন সেরে না। আর যদি ধরেই নেও যে, মুসলমানরা হিন্দু-ললনার উপরে অত্যাচার করত, তাহ'লেও ঐ অত্যাচারের প্রতিবিধান কল্পে তারা তাদের গায়ের বল, হাতের অস্ত্র, বুকের সাহস—সব ঢেকে রেখে তাদের মা বৌ বোনদের উপরে লুকুম জারি করল যে, তাদের বাইরে যাওয়া নিষিদ্ধ—এ যদি হয় তবে সেটা মানুষের সম্বন্ধে একটা ভাষণ রকমের নতুন Psychology বলতে হবে—যা মান্দাতার আমল থেকে মানুষের চরিত্র দেখে দেখে মানা করিন। বিশেষত মুসলমান কেবল বাঙলাদেশেই ছিল না—অন্য প্রদেশেও ছিল। স্তত্ররং আমার বিশ্বাস, একথা নিরীক্সে বলা যেতে পারে যে, বাঙালী যদি মুসলমানদের কাছ থেকেই অবরোধ প্রথা পেয়ে থাকে, তবে সেটা সে পেয়েছে ভয়ের ভিতর দিয়ে ততটা নয়, বতটা ভক্তির ভিতর দিয়ে।

সে যাহোক্, ঐ যে ভাছড়ী বংশের রাম ভাছড়ী যিনি নবাবের অমুখ পরগণার দেওয়ান, বছরে মাইনে পান হাজার মোহর, দু-পা যেতে হলে যঁর পাঙ্কা চাই, যঁকে দেখে সাধারণ অসাধারণ গণ্য নগণ্য সবাই তটস্থ, তাঁর গৃহিণী কাতায়নী দেবীর ব্যবহারটা হওয়া চাই নবাব অস্ত্রপুণ্ডরবাসিনীদের মতো; কারণ সেইটেই যে আভি-জাতের চিহ্ন, সেটাই যে বড়মামুখী চাল। তাই কাতায়নী দেবীর



মাথায় অবগুষ্ঠন চড়ল। আর এই অবগুষ্ঠনের দুঃখের চাইতে একটা বড় সুখ কাত্যায়নী দেবীর মনে বাসা বাঁধল—সেটা হচ্ছে, ঐ আভিজাত্যের গর্ব—তিনি যে বড়ঘরের গৃহিণী সেই অনুভবের সুখ। আর এই সুখই কাত্যায়নী দেবীর আসল সুখ, কেননা আগেই বলেছি যে, মানুষের সুখ হচ্ছে তার অন্তরের বাসনা বা আকাঙ্ক্ষার সার্থকতা, আরও বলেছি যে, মানুষের অন্তরের এই বাসনার পরিবর্তন ঘটতে পারে—তার ইচ্ছাশক্তির জোরে। সেইজন্মে মানুষের সুখ দুঃখ তার বাহিরের কোন অবস্থা বিশেষই নয়।

বাস্তবিক এ সত্যের উদাহরণ জগতে অসংখ্য মেলে। চীনে-রমণী যে লোহার ছুতো পরে' পা ছোট করে' রাখে, যে-পা দিয়ে অবশেষে হাঁটাই যায় না, এর পিছনে রয়েছে চীনে-রমণীর পা ছোট হওয়ার সঙ্গে সঙ্গে সে সুন্দরী হয়ে উঠেছে—এই মনোভাব। এইজন্মে পা ছোট হওয়ার দুঃখ, হাঁটতে না পারার দুঃখ, তার দুঃখই নয়। আমি নিজ চোখে দেখেছি একটি ছোট মেয়ে নাকের জলে চোখের জলে হচ্ছে হাতে উঁকি পরবার কালে। কিন্তু হ'লে হবে কি?—ঐ উঁকির সাথে সাথে যে, তার হাতখানি সুন্দর হয়ে উঠবে, এই মনের ভাব মেয়েটিকে এমন একটা জগতে নিয়ে ফেলেছে, যেখানে শরীরের ব্যথা মোটেই আসন পায় না। হাতটা কাঁধ থেকে নীচের দিকেই নামা যে সুখের, তার প্রমাণ আবশ্যক করে না। কিন্তু উর্দ্ধবাহু যে, সেই হাতখানাকে উঁচু করে' ধরে তাকে শুকিয়ে ফেলল, তার পিছনে উর্দ্ধবাহুর মনের এই সুখটা রয়েছে যে, ঐ সঙ্গে সঙ্গে তার পশ্চাদ্ভাবন লাভ হচ্ছে—ভগবানের কাছে যাবার পথ সরল হ'য়ে উঠেছে।

এমনি করেই হয়ত সেকালের ধনী-গৃহিণীস্বদের মাথায় অবগুষ্ঠন চড়ল, তাদের অন্তঃপুরের দরজা জানালা বন্ধ হ'ল। আর তারপর "মহাজনো যেন গত স পত্না" না মানলেও ধনীলোকেরা বা করেন নির্ধনরাও যে তাই করেন, অন্তত করতে চেষ্টা করেন এ সত্য আজও দেখা যায়। স্মৃতির ঐ ফ্যানসি ক্রমে ক্রমে দেশে ছড়িয়ে পড়ল—এবং দিনে দিনে মাসে মাসে বৎসরে বৎসরে শতাব্দীতে শতাব্দীতে ওটা দেশের মাটা ও নারীর মনকে এমনি করে' জড়িয়ে ধরল যে, অবশেষে বঙ্গীয় মহিলাদের ওটাই সত্য হ'য়ে উঠল—স্মৃতির ঐটেই দুঃখের হ'য়ে উঠল।

তারপর সুখ দুঃখের কথা। আসলে মানুষ যে অবস্থাতেই থাক না কেন, সেখানেই সে আপনার সুখ দুঃখ সৃষ্টি করে' বসে। কারণ সুখ দুঃখটা মানুষের মনের ধর্ম। মন যতদিন আছে, ততদিন সে যেখানেই যে-অবস্থাতেই থাক না কেন, সেখানেই সে আপনার সুখ দুঃখের আশ্রয় খুঁজে নেবে। মিস্ পাক্ হার্নস্টের দুঃখ—নারীর ভোটে অধিকার মিলছে না বলে', শ্রীমতী শতদলবাসিনীর দুঃখ—তার দড়া-হারটা ঠিক ডেপুটী ম্যাজিষ্ট্রেটের মেয়ের মতো হয় নি বলে'। যদি বল যে, মিস্ পাক্ হার্নস্টের মধ্যে রয়েছে নারীর পূর্ণতার রূপ, পূর্ণতার প্রকাশ। তাহোক। শতদলবাসিনী আজ যা, তার কাছে নারীর ঐ পূর্ণতার রূপ বা প্রকাশের কোন মূল্যও নেই যানও নেই। সে এখন যা, তার কাছে মিস্ পাক্ হার্নস্টের ভোট না পাওয়ার দুঃখ পাগলামি, আর মিস্ পাক্ হার্নস্ট আজ যা, তার কাছে শতদলবাসিনীর দড়াহার সম্বন্ধীয় দুঃখ ছেলেমানুষী। আমি আগেই বলেছি যে মানুষের সুখ দুঃখ subjective, আসলে



স্বথ হুংথ বাহিরেও আছে, ভিতরেও আছে। বাঙালীর অস্তঃপুরেও হাজার হাজার স্বথী গৃহিণী মিলবে। স্ততরাং অবরোধের ভিতরে হুংথের একচেটে কারাবার—এ কথাটা ঠিক নয়, আর বাহিরে স্বথের অবিরাম হিল্লোল, এত বড় মিথ্যে কথাটাও আজ আমরা বাঙালীর নারী-সমাজকে বলতে পারব না।

অবরোধের বিরুদ্ধে যে দুই অভিযোগের কথা প্রবন্ধের গোড়ায় বলেছি, সে দুই অভিযোগ থেকে অবরোধকে বাঁচাতে হ'লে এই সব কথাই বলা চলতে পারে।

( ৩ )

আমরা অবশ্য অবরোধের স্বপক্ষে নই। আমরা নারীর অবরোধের বিরুদ্ধে এইজন্তে যে, যেমন পুরুষ তেমনি নারী তার পক্ষে দেহ বা মনের রুদ্ধ অবস্থা একটা ঘোর মিথ্যা অবস্থা। সাংসারিক স্বথ হুংথের চাইতেও মানুষের কাছে তাঁর স্বাভাৱ্য বড়, অবরোধ প্রথা নারীর আত্মাকে খর্ব করে বলেই তা অসহ্য।

আমলে বাঙালীর পুরুষ যেমন কেরাণীগিরি করবার জন্মেই জন্মে নি—বাঙালীর নারীও তেমনি শাস্ত্রবাক্য “পুত্রার্থে ক্রীয়েতে ভার্যাঃ” সত্ত্বেও কেবল গর্ভধারণের জন্মেই জগতে আসে নি। আকাশ বাতাসের সঙ্গে পুরুষের যে সঙ্গ, নারীরও সেই সঙ্গ। আমরা জন্মেছি এই জগতে। ভগবান আমাদের প্রাণ দিয়েছেন নড়বার চড়বার জন্মে—চোখ দিয়েছেন, কোঁতুহল দিয়েছেন—চুঁড়বার খুঁড়বার জন্মে। কিন্তু এই খোলা জগতটা নারীর জন্মে একেবারে

বন্ধ-পুঁথি করে' রেখে দেওয়ার পক্ষপাতী, আর যেই হোন— স্বাধীনতার মর্ম্ম বাঁরা একটুকুও অনুভব করেন তাঁরা হবেন না। আর ঐ হচ্ছে সবার চাইতে বড় যুক্তি।

যেটা মানুষের চোখে চোখে থাকে, সেই জিনিসটাই তার চোখে পড়ে না। সেই রকম, যে আচার ব্যবহারগুলো নিয়ে আমরা ঘরকন্না করি, তার কোন কোনটা ঘোর বীভৎস হলেও সেই বীভৎসতাটা আমাদের চোখ এড়িয়ে যায়। কিন্তু যখন একটুখানি নিজেকে আলুগা করে' দেখ'বার চেষ্টা করি—পারিপার্শ্বিকের প্রভাব থেকে মনকে, আজন্মের সংস্কার থেকে বুদ্ধিকে মুক্ত করে' সহজ স্বাভাবিক চোখে দেখতে চেষ্টা করি, তখন অদম্য হ'য়ে মনের পাতায় এই ভাব ফুটে ওঠে—কি অমানুষিক অত্যাচার! আমাদের মতোই রক্তমাংসের জীব, আমাদের মতোই যাদের মন আছে, বুদ্ধি আছে, কোঁতুহল আছে, চোখ আছে, তাদের এ জগতটাকে সাম্যসাম্যনি দাঁড়িয়ে দেখ'বার অধিকার নেই। যদি নেহাৎ তারা দেখতে চায় ত চোখের সামনে ঝিলমিলি ঝুলিয়ে। যখন ঐ চার দেয়ালের কথা স্মরণ করি তখন নিজেরই নিঃশ্বাস যেন রুদ্ধ হ'য়ে আস'বার মতো হয়। যদি বল যে, তোমার কাব্য-কল্পনা রাখ, বঙ্গ-নারীর ও-রকম কারও নিশ্বাস রুদ্ধ হ'য়ে আসে না। তবে বলি যে, ঐ ত সবার চাইতে বড় হুংথ, “হাজার বছরের নিষ্ঠুর বাস্ত তাদের মনকেও পাথরের মুঠোয় চেপে ধরেছে”। আর এই পাথরের মুঠোকে চিরন্তন করবার জন্মে আমরা কেউ কেউ দেই যুক্তি এবং এই মুঠোকে আলুগা করবার জন্মে আমরা কেউ কেউ করি তর্ক। আমাদের যুক্তি তর্কের আর শেষ নেই।

কিন্তু নারীও যে পুরুষের মতো এ জগতের বুক খোলা চোখে, মুক্ত মনে বিচরণ করবে, এটা এত সাদা রকমের সত্য যে, এর কোন যুক্তি খুঁজে পাইনে। আসলে যখন সত্যকে যুক্তি দিয়ে দাঁড় করাই, তখনই সত্যকে খাটো করি। সত্য সব সময়েই নিজগুণেই সত্য।

অবরোধকে চিরস্তন করে রাখবার জন্মে যাঁরা অনেক অনেক যুক্তি দেন, তাঁদের একটা যুক্তি কেবল একটু প্রাধান্যযোগ্য। তাঁরা বলেন যে, অবরোধের ঐ পাতকের মুঠোকে আলগা করলে, সমাজে বিশৃঙ্খলা বাড়বে—চরিত্রহীনতা বাড়বে।

প্রথমত—এ যুক্তির বিরুদ্ধে প্রমাণ আছে। এই ভারতবর্ষেই তামিল বলে' এক জাতি আছে। কি হিন্দু, কি খ্রিস্টিয়ান তাদের নারী-সমাজে অবরোধ প্রথা নেই। কিন্তু তাই বলে' তাদের সমাজ ব্যাভিচারের স্রোতে ভেসে যায় নি—তাদের সমাজ বিশৃঙ্খলায় ত উশৃঙ্খল হ'য়ে ওঠে নি।

দ্বিতীয়ত—মানুষকে যতটা প্রকৃতিগত উশৃঙ্খল বলে' ধরে' নেই—মানুষ ঠিক ততটা উশৃঙ্খল নয়। মানুষের দেহ ছাড়িয়ে প্রাণ, প্রাণ ছাড়িয়ে মন, মন ছাড়িয়ে আত্মা। মানুষ তার দেহ থেকে যাত্রা শুরু করে' আত্মার দিকে অগ্রসর হচ্ছে। আজকার মানুষ প্রায় মনের কাছকাছি এসে পৌঁছেচে। এই মনকে শিক্ষা দিয়ে শিষ্ট করা যায়। আর এই মনকে শিক্ষা দিয়ে স্ত্রী-পুরুষকে চরিত্রবান করাই হচ্ছে পাকা কাজ। স্ত্রী-পুরুষকে আলাদা রেখে তাদের চরিত্রবান করা হচ্ছে গোঁজামিল। গোঁজামিলের পক্ষপাতী যাঁরা, তাঁরা মন তাদের কোন দিনই লাভ হবে না। তবে পুরুষের মধ্যে শতকরা

এক শ' জনাই যেমন ভীষণ হবেন না—তেমনি নারীর মধ্যেও শতকরা এক শ' জনাই সাবিত্রী হবেন না। মানুষের কিছুই চৌকব হয় না—তার আর কি করা যাবে? কিন্তু এই চৌকব না হবার মানেও আছে; কারণ যে অনুর্ত্তানের যেখানে চৌকব নয় ঠিক সেই খানটায় তার অনন্ত সন্তানবনার বীজ নিহিত।

আসলে বুরোক্রেসি আজ আমাদের ঠিক ঐ কথাটাই বলছে। তারা বলছে যে, তোমরা স্বায়ত্ব-শাসন পেলে দেশে ঘোর বিশৃঙ্খলা হবে। আমরা কিন্তু সেটা মোটেও মানছি নে। আর আমাদের এই না-মানটা ঐ বিশৃঙ্খলা-যুক্তির চাইতে বড়।

ঠিক তেমনি আজ যদি কয়েকজন বিদুষী বঙ্গীয়-মহিলা প্রতিনিধি হ'য়ে বাঙলার পুরুষের পার্লিয়ামেন্টে এক আর্জি পেশ করেন—বঙ্গনারীর পর্দা তুলে দেবার জন্মে, আর আমরা যদি ঐ বিশৃঙ্খলার দোহাই দেই, তবে সেটাও কি ঠিক ঐ জাতীয় যুক্তি হবে না?

আসল মেয়েরা স্বাধীনতা পেলে যদি সমাজে বিশৃঙ্খলা বা ব্যাভিচার বাড়ি, তবে তা থেকে বাঁচবার জন্মে সমাজকে অল্প উপায় খুঁজে বের করতে হবে। ঐ আজুহাতে মানুষের প্রতি ভগবানের প্রথম দান যা—চোখ মেলবার অধিকার—চোখ মেলে এই জগতটাকে সহজ রূপে দেখে নেবার অধিকার—তা থেকে স্ত্রী-জাতিকে অনন্ত যুগ বঞ্চিত ক'রে রাখতে চায় যে, সে বর্বর না হোক, যোর স্বেচ্ছাচারী—অর্থাৎ ইংরেজিতে যাকে বলে' despot. এই despotism কি আমাদের সমাজে চিরস্থায়ী হবে?—আজকের দিনে এ কথা বিশ্বাস করা সাহস্যকি।



( ৪ )

কিন্তু আজ বন্দী-নারী-সমাজের পক্ষে সবার চাইতে আরামের ঋষর যেটা, সেটা হচ্ছে এই যে, বাঙলার পুরুষ-সমাজের সবাই স্ত্রী-স্বাধীনতার ক্ষেত্রে উদগ্রীব হয়ে ওঠে নি। তা যদি হ'ত আর বাঙলার সকল পুরুষ যদি তাঁদের আত্মীয়াদের অবগুষ্ঠন টেনে ছিড়ে তাঁদের দীপ্ত আকাশের তলে নিয়ে আস্তে-নতবে সেই আত্মীয়াদের আজ লাঞ্চার সীমা থাকত না। কেননা কোন জিনিসকেই বাহির থেকে পাওয়াই সত্য করে' পাওয়া নয়। ভিতরে যে সত্যের চিহ্ন-মাত্র নেই বাহিরের সেই সত্যের অনুযায়ী আচরণ করতে গেলে দুঃখই হয়, কারণ সেটা হচ্ছে তখন পরধর্ম।

সুতরাং হাজার কাজ, হাজার চিন্তা, হাজার অনুষ্ঠানের মাঝে আজ যেন আমরা এই কথাটাকে অস্বীকার না করি যে—সত্যই সুন্দর, সত্যই শোভন, সত্যই সহজ। যতক্ষণ এই সত্যকে আমরা অন্তরে গড়ে' তুলতে না পারব, ততক্ষণ সে-সত্যকে আমরা বাহিরে সার্থক করে' তুলতে কিছুতেই পারব না। আসলে কোন সত্যই বাহির থেকে পড়ে' পাওয়া যায় না, অন্তর থেকে গড়ে' তুলতে হয়। জীবনে যেখানেই আমরা এই সত্যটাকে অস্বীকার করব, সেখানেই আমাদের পরিণামে ঠকতে হবে।

কাজেই আমাদের সমাজের অন্তরে স্বাধীনতা আগে প্রতিষ্ঠা করতে হবে—তখনই বাহির স্বাধীনতার পক্ষে সহজ হবে, সত্য হবে ও সুন্দর হবে।

এর ক্ষেত্রে চাই স্ত্রী-পুরুষের মনের গঠন-ভঙ্গীর পরিবর্তন—জাদের শতাব্দীব্যাপী সংস্কারের বিসর্জন, আর তা হবে শিক্ষার ভিতর দিয়ে।

শিক্ষার ভিতর দিয়ে যখন মন, চিন্তা মুক্ত হ'বে তখনই বাহিরের স্বাধীনতা অমৃতময় হবে। কারণ এ শ্রবকের আগেই আমি বলেছি যে, মানুষের সুখ স্বচ্ছন্দ তখনই, যখন তার ভিতরের অবস্থার সঙ্গে তার বাহিরের অবস্থা খাপ খায়।

কিন্তু সবার চাইতে মানুষের সত্য বা—তার স্বাধীনতা—তার চোখ মেলে সহজ ভাবে এই পৃথিবীর বুকে মুক্ত আকাশের তলে দাঁড়াবার অধিকার—সেই অধিকারকে যে মানুষের জীবনে—তা সে মানুষ পুরুষই হোক বা নারীই হোক—শিক্ষা দিয়ে সত্য করে' তুলতে হয়—এর চাইতে মানুষের-জীবনে বড় পরিহাসের কথা আর কিছুই নেই।

শ্রীসুরেশচন্দ্র চক্রবর্তী।

## — রুবাইয়াৎ-ই-ওমর খৈয়াম । \*

—:~:—

১

রাত পোহালো—শুনছ সখি, দীপ্ত উষার মাজলিক ?  
লাজুক তারা তাই শুনে কি পালিয়ে গেছে দিখ্‌দিক !  
পূব গগনের দেব-সবিতার স্বর্ণ-উজ্জল কিরণ-ভীর  
পড়ল এসে রাজ-প্রাসাদের মিনার যেথা উচ্চশির।

২

স্বপ্নে যেন কষ্ট শুনি—রাত্রি জানি শেষ প্রহর—  
পানশালে মোর দৈববাণী—কর্ণেতে কার বাজল স্বর !  
বলছে হেঁকে—ওঠরে বাছা, ভরিয়ে নে তোর পেয়ালাটুক,  
জীবন-সুখা শুকিয়ে না যায়, আপশোবে ফের ফাটবে বুক !

\* পরসী কবি ওমর খৈয়ামের কবিতার একটি বিশেষ গুণ এই যে, যিনি তা পড়েন তাঁরই তা অসুখ্য কবিতার সৌভ হয। ইউরোপে এমন ভাষা নেই যাতে ওমর খৈয়ামের রুবাইয়াতের অসুখ্য নেই। সুধু তাই নয়, প্রতি ভাষাতেই তার নানা হাতের অসুখ্য আছে। বহু লেখক বাঙলা ভাষাতেও ওমর খৈয়ামের কবিতা অসুখ্য করতে চেষ্টা করেছেন—কিন্তু সে আশিষ্টকভাবে। মূল্য কান্তিকল্প বোধ রুবাইয়াৎ-ওমর আগাপোড়া তরঙ্গনা করেছেন—এই জন্ত বাঙলার পাঠক সনাতনের কাছে সে-গুলি উপস্থিত করছি।

সম্পাদক।

৩

রক্ত-দুয়ার পানশালাটির সামনে সে কি হট্টগোল,  
ভোরের ডাকে বলছে কারা—খোল রে ওরে দুয়ার খোল !  
কতক্ষণ বা রইব হেথা, ছুটছে আয়ু ব্যস্ত পায়,  
বিদায় নিলে ফিরব না আর—অন্তহীন যে সেই বিদায়।

৪

নওরোজ্জেতে সেই পুরাতন বার্থ যত মনের আশ  
উঠছে কত ভাবুক মনে, দিচ্ছে মোড়া স্মৃতির পাশ।  
কোন ছুখেতে যায় সে চলে' কোন নিরীলা বনের মাঝ,  
ঈশার খাসে গুল্মলতার নবীন যেথা পত্র-সাজ।

৫

ঈরান্ন নিয়ে পালিয়েছে তার গর্ক্ব বা' সব গুল্ম-বাহার,  
জামশিয়েদের খাস-পেয়ালা—কোথায় গো আজ চিহ্ন তার !  
তবু  
আর  
ক্রাঙ্ক-বুকে তেমনি আজও জ্ব'লছে চুনির রক্তহার,  
খুঁজলে আজও মিলবে না কোন ফুল-বাগিচা নদীর ধার।

৬

দায়ুদ সাথে ফুরিয়েছে আজ সব পুরাতন ছন্দ-ফের,  
বুলবুলেরি কঠে শুধু বাজছে ভায়ার সাবেক জের।  
সেই স্বরেতে চাইছে সে আজ গোলাপসখীর বর্ণ লাল—  
রক্ত-রাঙা ক্রাঙ্কাসারে রাঙিয়ে নিতে হলুদ-গাল।



৭

আজ ফাগুনের আগুন-জ্বালে ছত্ৰাশ-বোনী শীতের বাস  
পুড়িয়ে সে সব ছাই ক'রে দাও—দাও আছতি দুখের শ্বাস!  
আয়-বিহগ—খোঁজ রাখ কি—মেলিয়ে ডানা উড়ল্‌ হায়,  
পেয়লাটুকু শেষ করে' নাও, এক চুমুকেই ফাগুন যায়।

৮

কতই না আজ ফুল ফুটেছে, অযুত বরণ, উষার মাঝ,  
লক্ষ ফুলের সমাধি'পর—তাদের স্মৃতি তুচ্ছ আজ!  
এই ফাগুনের ফুলের বাসে দেখবে কোথা তলিয়ে ঘান  
জান্শিয়েদের অতীত স্মৃতি, কৈকোবাদের জীবন-গান!

৯

ভাগালিপি মিথ্যা সে নয়—কুরায় যা' তা' ফুরিয়ে যাক;  
কৈকোবাদ আর কৈকসুন্দর ইতিহাসেই নামটা থাক।  
রাস্তম আর হাতেম ভায়ের কল্পকথা স্মৃতির কাঁস—  
সে সব খেয়াল ঘুচিয়ে দিয়ে আজকে এসো আমার পাশ।

১০

আমার সাথে আসবে যেথায়—দূর সে রেখে সহর গ্রাম—  
এক ধারেতে মরু তাহার, আর এক দিকে শম্প শ্যাম।  
বাদশা-নফর নাইক সেথা—রাজনীতির চিন্তাভার;  
মামুদশাহ?—দূরে থেকেই করূব তাঁরে নমস্কার।

১১

সেই নিরীলা পাতায়-ঘেরা বনের ধারে শীতল ছায়,  
খাও কিছু, পেয়লা হাতে ছন্দ গেঁথে দিনটা যায়!  
মৌন ভাঙ্গি, মোর পাশেতে গুঞ্জে তব মঞ্জু সুর—  
সেই তো সখি স্বপ্ন আমার, সেই বনানী স্বর্গপুর!

১২

রাজ্যসুখের আশায় বুধা কেউবা কাটায় বরণ মাস,  
স্বর্গসুখের কল্পনাতে পড়ছে কারুর দীর্ঘশ্বাস।.....  
নগদ যা' পাও হাত পেতে নাও, বাকীর খাতায় শূন্য থাক—  
দূরের বাছ লাভ কি শুনে?—মাঝখানে যে বেজায় ফাঁক।

১৩

সত্ত-ফোটা এই যে গোলাপ, গন্ধ-শ্রীতি-উজল-মুখ,  
ব'ল্‌ছে না কি—মিথ্যা এ সব, এই ক্ষণিকের ছুঁখসুঁখ!  
পুখী-বুকে উঠছি ফুটে গর্বে পরি' রঙিন সাজ—  
পাপড়ি টুটে ছড়িয়ে মোদের জীবন-রেণু পথের মাঝ!

১৪

কুহক-রাণী আশার পিছে দিল্‌টা ফিরে সর্বদাই,  
স্বপ্ন কার সত্য বা হয়, কার ভাগে বা উঠছে ছাই!  
সব ক্ষণিকের—আসল ফাঁকি—সত্য মিথ্যা কিছুই নয়—  
মরুর 'পারে তুবার মতো চিকুমিকিয়ে পায় সে লয়।

১৫

জীবন-ক্রমির 'পরে যারা যত্নে বোনে সোনার বীজ,  
হাওয়ায় বুনে ফুৎকারেতে করছে যারা সব খারিজ ;—  
খতম যে সব এইখানেতেই—বীজ না ফলে পুনর্বীর,  
গোবের ভিতর যে জন, সে কি জীবন নিয়ে ফিরবে আর !

১৬

জীর্ণভাঙ্গা সরাই-খানার রাত্রি দিবা দুইটি ছাৱ,  
তারির ভিতর আনাগোনা—দুনিয়াদারি চমৎকার !  
রাজার পরে আসছে রাজা, সজ্জা কতই বাছ ধুম—  
তুচ্ছ সে সব—কয়দিনই বা ?—তার পরে তো সব নিঃসুম !

১৭

জাম্শিয়েদের পেয়লা-মুখর্ খাস্-দেয়ালের খিলানমাক  
বাস বেঁধেছে আজকে সেখায় টিকুটিকি আর সিংহরাজ !  
রাজার সেরা রাজ-শিকারী বরান্ কোথায় ঘুমিয়ে রয়—  
আজকে তো তার মাথার 'পরে চাই মেরে যায় বঘ-হয় !

১৮

দার্ন-হিয়া কোন সে রাজার রক্তে-নাওয়া এই গোলাপ—  
কার দেওয়া সে লালচে আভা, হৃদয়-ছাঁচা শোণিত-ছাপ !  
ফুল-বাগিচায় ওই যে দোটে রঙের বাহার আশমানির—  
কোন রূপসী সীমস্তিনীর স্থনীল আঁখির দৃষ্টি স্থির !

১৯

আর এই যে কোমল দুর্বা গো, যার বৃকের ঘেরা আঁচল টুক  
লজ্জাশীতল শরন মোদের—সবজিয়েছে নদীর মুখ—  
আন্তে সখি পাশ ফিরে নাও—কি জানি এর ব্যথার ফের—  
কোন্ রূপসীর পাংলা টোঁটের জিয়ান্-রসে জশ্ম এর !

২০

অতীত যা' তার দুখের স্মৃতি, ভবিষ্যতের ভাবনা বোর—  
দিল্-শিয়ারা শাকী গো আজ পেয়লা ভরে' ঘুচাও মোর।  
আসছে যে কাল, তার কথা থাক্—মিশ্ব গিয়ে হয়ত আজ  
তুচ্ছ স্মৃতির সৌরভেতে লক্ষ অতীতকালের মাঝ !

২১

গর্বে যারা বইত শিরে ভাগ্যদেবীর আশীষ্-ভার,  
বক্ষে যাদের ছলিয়েছিল সর্ব স্নেহপ্রীতির হার ;—  
আজ দুনিয়ায় কোথায় তারা ?—পেয়লাটুকু আর সবার  
একটু আগে শূন্ ক'রে ঘুমিয়ে ঘোচায় শ্রান্তি-ভার !

২২

স্মৃতি যে আজ ক'রছি মোরা সেই পুরাতন ঘরের মাঝ,  
বসন্ত সেই দিচ্ছে বাহার—নূতন ফুলের রঙিন সাজ ;—  
ভাগ্যে সবার সেইতো লিখা—মাটির নীচে মরণ-পুর,  
পুনঃ মোদের পরে ক'রবে কারা সেই পুরেতে শ্রান্তিদুর !



২৩

মিশ্র ধূলোয়—তার আগেতে সময়টুকুর সদ-ব্যভার  
স্বৃষ্টি ক'রে নাই করি কোন—দিনকয়েকেই সব কাবার।  
পঞ্চভূতে মিলিয়ে যাব মুক্তা-পারের কোন সে দেশ—  
সেথা নাইকো সুরা, নাই সুকর্ণ—সেই অজানার নাইকো শেষ।

২৪

সচ ফলের আশায় মোরা মরছি খেটে রাত্রিদিন,  
মরণ-পরের ভাবনা ভেবে আঁখির পাতা পলকহীন।  
মুক্তা-আঁধার মিনার হ'তে মুস্কিভিনের সাড়া পাই—  
মূর্খ তোরা, কাম্য তোদের হেথায় হেঁথায় কোথাও নাই।

২৫

তর্ক তুলে কর্তব্য বার ছ্যালোক ভুলোক নতুমাং—  
কোথায় তাদের কণ্ঠ আজি—নির্ধিবাদে কিস্তিমাং ?  
বিধান তাদের ফুৎকারেতে উড়িয়ে সবাই দিচ্ছে আজ,  
আর মুখটি তাদের ধূলোয় ঠাসা—বন্ধ এখন জিভের কাঙ্ক।

২৬

বচন-বাগীশ পণ্ডিতেরা বিস্তৃতভাবে নাড়ুক শির,  
স্মরণ রেখো বন্ধুগো মোর—জীবন কল্প নয়কো স্থির।  
এই কথাটাই সত্য ভবে, বাকী যা' সব মিথ্যা, ভুল ;  
স্বজন-বোঁটার আর ফোটে না, বরলে পরে আয়ুর ফুল।

২৭

কতই না সে মাড়িয়ে আসা পণ্ডিতদের টোলের দোর,  
বয়স তখন নেহাৎ কাঁচা—কাজটা শোনা তর্ক বোর ;  
বিচার-ঘটে বিশ্ব পোরা—মুগ্ধমাথা নাইকো যার—  
তর্ক-ধাঁধার কিব্বতি-দুয়ার—ঠিক যেথা তার প্রবেশ-দ্বার।

২৮

তাদের সাথে ক'রনু রোপন বীজটি গোপন জ্ঞান-তরুর,  
জলটি সেচন আপন হাতে—ফল ফল ফল মরুর ;  
যত্নে সে মোর চায়নে করা জ্ঞান-ফলের অর্থ-জের—  
শ্রোতের মতই ভাসতে আসা, ইওয়ার সম উধাও ফের।

২৯

কেনই বা মোর জন্ম নেওয়া এই যে বিপুল বিশ্বমাক,  
আমিছি ভেসে কিসের শ্রোতে—হেথায় বা মোর কিসের কাঙ্ক।  
কোথায় পুনঃ—কেই বা জানে—ফিরতে হবে কোনও দিন—  
উধাও সে কোন মরুর 'পরে হাওয়ার মতন লক্ষ্যহীন।

৩০

কোথায় ছিলাম, কেনই আসা—এই কথাটা জানতে চাই,  
জন্ম-কালে ইচ্ছাটা মোর কেউ তো কেমন স্বধায় নাই।  
যাত্রা পুনঃ কোন লোকেতে ?—প্রশ্নটা মোর মাথায় থাক—  
শ্রীগাদেবীর জুরপরিহাস পেয়ালা ভ'রে ভোলাই যাক।

৩১

পৃথী হ'তে দিলাম পাড়ি, নভঃগ্রহে মনটা লীন—  
সপ্ত-রাশি যেথায় বসি ঘুমিয়ে কাটান রাত্রিদিন।  
বিছাটা মোর উঠল কেঁপে, কাটল কত বাঁধার ঘোর—  
শুধু মৃত্যুটা আর ভাগ্য-লিখন, এই দুটো গোল লাগল মোর !

৩২

রুদ্ধ-দুয়ার স্বজন-বরের কুঞ্জিকাঠির নাইকো ধোঁজ,  
দেখতে না পাই ভাগ্য-বধর ঘোমটা-ঢাকা মুখ-সুরোজ ;  
বারেক দুবার কর্তে কাহার শুনছি শুধু নামটা মোর—  
কয়দিনই বা ?—সাম্র তো হয় সর্বনামের নেশার ঘোর !

৩৩

ভিমির পথের বাতী মোরা—দীপ্ত আশার রশ্মি কই ?  
মন্ত্বে হ'য়ে লক্ষ্যহার—স্বর্গ পানে চাহিয়া রই।  
কর্ণে পশে দৈববাণী—কোথাও যে নেই আলোক-পথ,  
অন্ধ-নিয়ত চালিয়ে বেড়ায় বিশ্বনেমির ভাগ্যরথ !

৩৪

তখন আবার মুখটি ছুঁমি মাটির গড়া পেয়ালটির,  
সুধাই তারে—রহস্যটার অর্থ সে কি খুব গভীর ?—  
অধর 'পরে রাখতে অধর, বাজল কানে অফুট স্বয়—  
দ'দিন বাঁচো পান ক'রে নাও, কিরবে না আর মরণ পর !

৩৫

এই যে আমার পেয়লা-বঁধু জীবন-সাদা দিচ্ছে আঁজ—  
কোন অতীতের সাক্ষী এ জন্ম, কোন সকালের স্মৃতিবাঁজ !  
আজ পরিচয় ভিন্নরূপে—মৃত্যু-শীতল মাটির চাপ—  
তবু স্মৃতির নিশান নাই কি আঁকা ওই অধরে চুমোর ছাপ !

৩৬

সাঁঝের ঝোঁকে দেখ্নু সেদিন হাটের মাঝে কুস্তকার  
নির্ধূর হাতে ঠাসছে সে এক পিণ্ড ভিঙ্গা মৃত্তিকার।  
মাটির ঠোঁটে ফুটল বাণী—আওরাজটা তার বেজার ক্ষণ—  
আস্তে ভায়া আস্তে পেশো, নেহাৎ এ'জন ভাগ্যহীন !

৩৭

পেয়লাটুকু ভরিয়ে নেগো, এতই কিসের চিন্তা তোর ?  
সময়টা সব কাটছে বুখা—ভাবনা কি তাই দিনটা ভোর !  
একটা 'কাল'তো মরণ-পারে, আসছে যে 'কাল' কোথায় 'আজ' ?  
তাদের কথা ভাব'চি ব'সে এই ক্ষণিকের স্মৃতি মাঝ !

৩৮

এক লহমা সময় আছে সর্বনাশের মাঝে তোর—  
ভোগ-সায়রে ডুব দিয়ে কর শেষ নিমেঘটা নেশায় তোর !  
আয়ুর তারা প'ড়ছে খ'সে মরণ-উষার চরণ'পর—  
যাত্রা যে আজ ক'রতে হবে—ফুরিয়ে নে সব, ফরিৎ কর।



৩৯

কোন সে রসের আশায় বঁধু ম'রুছ ঘুরে রাত্রিদিন—  
 যুগী পথের নাইক সীমা, জ্ঞানস্ত সে কোথায় লীন।  
 সে সব ছেড়ে স্ফুর্তি কর, দ্রাক্ষারসে হও বিভোর,  
 বাস্ত তুমি যে রস আশে—মিথ্যা, নাইয় তিস্ত বোর!

৪০

আনিস্ তো সব বন্ধু তোরা—কাণ্ডটাই বা কয়দিনের—  
 মোর বাস্তভিটায় উথলে ওঠা নূতন বিয়ের স্ফুর্তি-জের।  
 বন্ধ্যা-প্রিয়া যুক্তিদেবী, সেই রাতে তার নির্বাসন,  
 আর সেই বাসরে নূতন বধু আঙুরলতার সম্ভাষণ!

৪১

অস্তি-নাস্তি শেষ ক'রেছি, দার্শনিকের গভীর জ্ঞান,  
 বীজগণিতের সূত্র-রেখা মৌবেনে মোর ছিলই ধ্যান।  
 বিচারসে যতই ডুবি—মনটা জানে মনে স্থির—  
 মোর দ্রাক্ষারসের জ্ঞানটা ছাড়া রস-জ্ঞানটা নয় গভীর!

৪২

এই তো সেদিন সাঁঝের বেলা, পেয়ালা হাতে, গোপন পায়  
 স্বর্গ-দৃষ্টী এল সে মোর মুক্ত-দুয়ার পানশালায়;  
 ব'ললে মোরে—পাত্র-স্থায় চুমুক দে' নাও একটি বার—  
 দেখবু চেখে—আর কিছ নয়, সেই পুরাতন দ্রাক্ষাসার!

৪৩

সেই পুরাতন দ্রাক্ষা গো—তার হায়-বিধানের হউক জয়,  
 অমোঘ বাহার সূত্রেতে হয় সর্ব্ব ধর্ম্মসমগয়।  
 আঙুর-চোয়া অলুকিমিয়া রসের সেরা রসান-ভূপ,  
 জীবন-কাঁশার পাত্রখানা স্পর্শে ধরে সোনার রূপ!

৪৪

সেই পুরাতন দ্রাক্ষারধু—মামুদশাহের মতন সেই,  
 দুঃখ-কাকের মৃতিগুলোয় বারদরূপে ভাড়াই সেই।  
 ঐন্দ্রজালিক অস্ত্রটি যার দৌর্ণ করে সকল ভাগ,  
 আত্মারে যে করায় পুনঃ স্ব-স্বরূপে অধিষ্ঠান!

৪৫

বিজ্ঞ যিনি বিজ্ঞ আছেন—তর্ক নিয়ে থাকুন ঘোর,  
 স্থপ্তি-বিচার, তত্ত্ব-কথা হুটিয়ে এস সঙ্গে মোর।  
 একটি কোণে ব'সব দৌহে, হট্টগোলের চের তফাৎ,  
 ভাগ্য—বাহার খেলনা মোরা—ক'র্ব তারেই পাত্রসাৎ!

৪৬

উক্কে, অধেঃ, ভিতর, বাহির, দেখছ যা' সব—মিথ্যা ফাঁক—  
 কণিক এ সব ছায়ার বাজী পুতুল-নাচের ব্যর্থ জাঁক।  
 পৃথীটাতো মায়ার খেয়াল—সূর্য-বাতির ফানুস-খোল—  
 ছায়ার পুতুল আমরা সবাই চৌদিকে তার ক'রছি গোল!

৪৭

রক্ত অধর এই যে চুমি, পান করি লাল মদির টুক—  
নিখা এ সব শূন্য স্বপন—আপশোষে তাই ফাটবে বুক ?  
কাল্ টা অসৌম শূন্যে ঘোরে, শূন্যে ঘেরা মায়ার জাল—  
শূন্যে খেলা শেষ করে আজ মিশ্ব নাহয় শূন্যে কাল।

৪৮

নদীর ধারে ফুটবে যবে, ফুটবে গোলাপ রঙ-বাহার—  
পিওগো এসে কবির সাথে রক্ত-রাঙা জাফাসার ;.....  
কাল্-সাকীটি পেয়ালা ভরে আসবে যবে সর্ব্বশেষ—  
নিওগো তাহা হাত-মুখে, বিনা দ্বিধার চিহ্নলেশ।

৪৯

ছক্টি আঁকা স্বজন-বরের, রাত্রি দিবা দুই রঙের,  
নিয়ত-দেবী খেলছে পাশা, মানুষ দু'টি সব চঙের।  
শ'ড়ছে পাশা, ধ'রছে পুনঃ, কাটছে দু'টি, উঠছে কের—  
বাক্সবন্দী সব পুনরায়, সাঙ্গ হ'লে খেলার জের।

৫০

নাহিকো পাশার ইচ্ছা স্বাধীন—যেই নিয়েছে খেলার ভার,  
ভাইনে বাঁয়ে ফেলছে তারে, যখন যেমন ইচ্ছা তার।  
মানুষ নিয়ে ভাগ্য-খেলায় করেন যিনি কিল্লিমাৎ—  
সবটা জানেন তিনিই শুধু,—জয়-পরাজয় তাঁরই হাত।

৫১

ললাট 'পরে নিয়ত দেবীর ভাগ্যালিপির হস্তছাপ,  
উঠবে না সে—চেপ্টা বুখা, মিথ্যা এ সব মনস্তাপ।  
উঠুক না সে গভীর শ্বাস, আর ক'ল্জে-কাটা অশ্রুধার—  
ভাগ্যদেবীর হস্তটি না ধ'রবে লেখন পুনর্বার।

৫২

মাথার পরে উপুড়-করা পেয়ালা, যারে স্বর্গ কয়,  
যার নীচেতে চুপটি করে চক্ষু বুজে দিনটা বয় ;  
হস্ত জুড়ে তার কাছতে চাইছ কিবা ভাগ্য-দীন ?  
নিয়ত-স্বতোয় বক ও-যে, তোমার মতই শক্তিহীন !

৫৩

মুক্তিকাতে তৈরী যেদিন মূর্ত্ত মানব পৃথীতল,  
সেই মাতীতেই বীজটি বপন—ভবিষ্যে যা ধ'রবে ফল।  
সেই স্বজনের প্রথম উষার ভাগ্যালিপির অক্ষপাত  
ফুটবে পুনঃ শেষ বিচারের প্রলয়-উষার জন্মসাথ !

৫৪

তোমায় না হয় ব'লেই রাখি—প্রথম যেদিন যাত্রা মোর,  
চোখের জলে বিদায় নিয়ে পেরিয়ে এলু স্বর্গ-দোর ;  
কোন শাপেতে হেথায় আসা, ভাগ্য-দেবীর অনুজ্ঞায়—  
আন্তে পথে দেখু য়ে মোর অস্থিতে কার চিহ্ন ভায়।



৫৫

ক্রাকালতার শিকড় সেটা—তার না জানি কতই গুণ—  
জড়িয়ে আছেন অস্থিতে মোর—দরবেশী-সাঁই ঘাই বলুন ;  
গগন-ভেদী চাঁৎকারে তাঁর খুলবে নাকো মুক্তি-দ্বার,  
মোর অস্থি মাঝেই মিলবে যে খোঁজ সেই দুয়ারের কুঞ্জিকার ।

৫৬

এই তো জানি বন্ধুগো মোর—সত্যজ্যোতির প্রকাশ টুক  
—রাগেই কিম্বা প্রেমসেই ফুটে ভরায় যা' মোর আঁধার বুক—  
নিমেষ তরে পাই যদি তার আভাসটা মোর পানশালায়,  
আঁধার-ঘেরা মন্দিরেতে কেনই যাব—কোন জালায় !

৫৭

তুমিই প্রভু পথটিতে মোর গর্ভ, বোঝাই রাখলে পাঁপ,  
ক'রলে সেটি সুরায় পিছল—তুমিই প্রভু ক'রবে মাপ ;  
আপন হাতেই খুলবে না কোন ভাগ্য-সূতোর পাকটা ঘোর,  
পতনটা সেই পাপের ফলে—ব'ল্বে কিগো দেবতা মোর ?

৫৮

মানব সৃজন ক'রলে, দিয়ে মুক্তিকাতে পাপের ছাপ,  
মহান্ তোমার বিশ্ব-বাগে খেলাও পঞ্চ-রিপুর সাঁপ ।  
পাপের কালো মূর্ত্তি নিয়ে জীব জগতে ঘুরছে হায়—  
মানুষ তোমায় ক'রছে ক্ষমা—তুমিও, হে দেব, ক্ষমিও তায় ।

৫৯

শুনছ বঁধু—উপোস্ ভেঙে, রাত্রি যবে এক প্রহর,  
রম্জানেরি পর্ব্বশেষে উঠ'নু-গিয়ে কুমোর-ঘর,  
চাঁদের দেখা নাই আকাশে, ঘরটিতে কেউ নাইকো আর—  
শুধুই কেবল ভাঙ্গা-গড়া সুরাই যত মুক্তিকার ।

৬০

শুনলে বঁধু অবাক হবে—সেই সাজানো মাটির তাল—  
তার মাঝে কেউ কথা শোনে, কেউবা বোনে কথার জাল ।  
ব'ল্লে কে এক হঠাৎ রোষে—ব্যস্তবাগীশ ক'ঠ তার—  
কেইবা এ সব কুস্ত মোরা—কেইবা সেজন কুস্তকার ?

৬১

ব'ল্লে সে এক কুস্ত ধীরে—নয় বৃথা এ জ্ঞান-শাস,  
করলে যে জন বুদ্ধি খরচ—সৃষ্টি আপন ক'রবে নাশ ?  
এ সব কি আর অমনি যাবে—ক্ষিত্তে হবে পুনর্বার,  
সেই পুরাতন মাটির ঘরে, সেই কবেকার জন্মাগার !

৬২

ব'ল্লে আর এক পেয়লা ভারে—তব্ব এটা খুব গভীর,  
বালক—সেও পানের পরে খোঁজটা রাখে পাত্রটির ।  
গ'ড়লে যে জন আপন হাতে কতই স্নেহ-কল্পনায়—  
আর কি পারে রাগের ভরে নষ্ট ক'রতে তায় ।

৬৩

সেই কথাতেই শাস্ত হ'ল উঠ'ছিল যে তর্কজাল ;  
মোর্ন ভেঙে ব'ল'লে পরে বিক্রী সে এক কাদার তাল—  
বক্র ব'লে সেই পরিহাস, চিন্তে না পাই দিখিদিব,  
গড়ন-কালে কুস্তকারের হস্তটা কি প'ড়তো ঠিক ?—

৬৪

ব'ললে আর এক—কেউ বা তারে ব'ল'ছে পাজী ঘটনদার,  
মুখখানা তার আঁকুছে দিয়ে নরক-ধোয়ার অক্ষকার ।  
যাচাই মোদের ক'রবে সে জন ?—কথার কথা ফক্কিয়ার—  
লোকটা কিন্তু মন্দ সে নয়—মন্দ কি হয় তার বিচার !

৬৫

কোণটি হ'তে সুরাই সে এক বল'লে ফেলে নিশাদ-ভার—  
মাতীর দেহ শুকিয়ে গেছে—অনেক দিন তো নেই ব্যাভার ;  
মোর পুরাতন ড্রাক্স-বঁধু—পাই যদি আজ স্বাদটি তার—  
হচ্ছে মনে—জীর্ণ দেহে বলটা ফেরে পুনর্বার ।

৬৬

পাত্রগুলো কথার মাঝে আকাশ 'পরে দেখতে পায়  
চন্দ্র নবীন—যার লাগিয়া সব আছিল প্রতীক্ষায় ;  
কে কার ঘাড়ে পড়'ল তখন, ব'ল'লে দিয়ে টিপনি এক—  
আজ ঋতুতে আর মত্তে বোঝাই মুটিয়াগুলোর কাণ্ড ছাথ !

৬৭

চেতিয়ে তুলো মরণকালে ড্রাক্সসুখায় প্রাণটা মোর,  
মদির-স্নানটা করিয়ে দিও, যুচ'বে যবে মায়া'র ঘোর  
পরিয়ে দিও যত্নে স্নেহে আঙুর-পাতার বহির্বাণ,  
আর গোর দিও এক বাগান-ধারে, সজীব যেথায় ফুলের চাষ ।

৬৮

সৌরভেতে ক'রবে আকুল, থাকবে যা' মোর ভ্রমসার—  
জাল পেতে সে থাকবে ব'সে, হাওয়ায় বুন গন্ধ তার ;  
ভগু যত ভক্ত বিটেল পড়'বে ধরা চ'লতে পথ,  
মদিরগন্ধ পাগল হাওয়ায় উপেটেবে তার বিধান-রথ ।

৬৯

খেয়াল-পুঞ্জোয় পুতুল-খেলায় কাট'ল কতই দিন যে মোর,  
লোকের চোখে দোষের ভাগী—'র'টুলো খারাপ নামটা ঘোর ;  
মূর্ত্ত খেয়াল-দেবতাগুলোই খাতির ডোবার পেয়লা মাঝ—  
স্বনামটা মোর সস্তা বিকোয় শুনলে মিঠে সুরের ভাঁজ !

৭০

দিব্য দিয়ে ত্যাগ করিমু—চক্ষুজলও প'ড়ল ঢের—  
তবে শপথকালে হয়না মনে গিছলো কেটে নেশার জের !  
তারপরে যেই ফাগুন এল, বাড়িয়ে গোলাপ-রঙীন হাত—  
কোথায় গেল দ্বীণ অনুতাপ, গন্ধ-আকুল মলয় সাথ !



৭১

খাতির খিলাং কাড়লে সে মোর—খেয়ালমাক্ফিক কার্য তার,  
 ড্রাকাদেবীর নাই মহিমা—কাকের মতই সব বাভার !  
 তবু প্রসন্ন ওঠে মনটাতে এই—ড্রাকাকলের চাষটা যার—  
 কোন্ মহার্ঘ্য পণ্যলোভে বিকোয় এমন সুধার ভার !

৭২

হায়, গোলাপ সাথে প'ড়বে স্ব'সে বসন্তেরি সব বাহার,  
 মিশ্বে কোথা ঘোঁবনেরও পাগল-করা গন্ধভার !  
 পাতার মাঝে চ'ম্কে ওঠে আজ পাপিয়ার উচ্চতান—  
 কোন্ বিদেশের কর্ণটি ওই—কোথায় সে কাল গাইবে গান !

৭৩

নিয়ত-দেবীর চরকা-সূতোর ধরতে পারি খেঁইটা আজ,  
 ভাগ্য সাথে ষড়্ ক'রে তার পাইগো খোলা দুয়ার-মাঝ ;  
 নিষ্ঠুর পায়ে চূর্ণ করি বিশ্ব-সৃষ্টি কল্পনায়  
 নূতন সৃষ্টি গ'ড়তে প্রিয়া পারব নাকি দুই জনায় !

৭৪


দেখুছ প্রিয়া—পূব গগনের পূর্ণ-কিরণ টাঁদটি আজ  
 দিচ্ছে উঁকি পাতার কাঁকে মোদের মিলন-কুঞ্জ মাঝ ;—  
 তোমার করি সেই যেদিনে ভুলবে ধরার মিলন-সুখ,  
 কার পোঁকে ওর প'ড়বে হেথায় অন্ত-মলিন দৃষ্টি-টুক !

৭৫

বিভোর প্রাণে আসবে যেদিন আমার মিলন-প্রতীক্ষায়,  
 তৃণাসনে অতিথ-সভা ছড়িয়ে মেথা তারার প্রায় ।  
 উজল পায়ে আসবে যখন আমার যেথায় ছিল স্থান,  
 উপুড় করে' রেখে সেথায় আমার শূন্য পাত্রখান !

শ্রীকান্তিচন্দ্র ঘোষ ।

## দেশের কথা ।



বাঙলার ঈর্ষনৈক নেতার মুখে সেদিন শুনলুম যে, বসে ও মাদ্রাজের লোকেরা পলিটিকাল হিসেবে, আমাদের চাইতে ঢের বেড়ে গিয়েছে। এ সত্য তিনি দিল্লিতে আবিষ্কার করে, এসেছেন, অতএব বলা বাহুল্য যে, তিনি বামমার্গের একজন মহাজ্ঞান ।

একথা যদি সত্য হয়, তা'হলে আমরা লজ্জিত হ'তে বাধ্য কিন্তু এর জন্য আমাদের দুঃখিত হবার কোনই কারণ নেই। ইংরাজের অধীনে সমগ্র ভারতবর্ষ রাষ্ট্র হিসেবে একদেশ হয়ে উঠেছে এবং ইংরাজি শিক্ষার গুণে শিক্ষিত সম্প্রদায়ের মনে সমগ্র ভারতবর্ষের রাষ্ট্রীয় ঐক্যজ্ঞান জন্মলাভ করেছে। সুতরাং ভারতবর্ষের যে কোনও প্রদেশ মনে কিম্বা জীবনে এক ধাপ উঁচুতে চড়ে' যাবে, সে প্রদেশ সমগ্র ভারতবর্ষকে সঙ্গে সঙ্গে টেনে' তুলবে, এবং প্রতিবেশীর সাহায্যে আমরা বাঙালীরাও জাতি হিসেবে একটু উঁচুতে উঠে যাব! ইংরাজের আইন আমাদের জীবনকে এবং ইংরাজের ভাষা আমাদের মনকে একসূত্রে এমনি গাঁথেছে যে, একের টানে অপরে চলতে বাধ্য। সুতরাং বন্দে মাদ্রাজে যদি নবজীবনের আত্যন্তিক স্ফূর্তি হয়েই থাকে— তাহ'লে সে জীবনী-শক্তি আমাদের মন প্রাণকেও ধাক্কা দেবে। এ ত স্ব-সংবাদ !

তবে কথাটা একেবারে সত্য বলে গ্রাহ্য করবার পক্ষে কিঞ্চিৎ বাধা আছে। প্রথমত, পলিটিকালি বেড়ে যাবার অর্থটা কি?—যদি কেউ বলেন যে, আমাদের তুলনায় ছপার দেশের লোকেরা রাজনৈতিক আন্দোলনটা বেশি মাত্রায় ও বেশি জোরে চালাচ্ছে, তাহ'লে তার উত্তর, সে ত প্রত্যক্ষ সত্য। কিন্তু রাজনৈতিক আন্দোলনটাই যে জাতীয় জীবনের একমাত্র লক্ষণ, তা অবশ্য নয়। বাঙলার বেশির ভাগ লোক আজকাল রাজনৈতিক আন্দোলনে যোগ দিতে নারাজ বলে' বাঙলার জাতীয় আত্মা যে ঘুমিয়ে পড়েছে, এ রকম অনুমান একমাত্র প্রত্যক্ষদর্শীরাই করতে পারেন—যাঁরা বাঙালীর মনের খবর রাখেন, তাঁদের পক্ষে ও-রকম সিদ্ধান্তে উপনীত হওয়া অসম্ভব। যদি কেউ জিজ্ঞাসা করেন, সে মনের সন্ধান কোথায় পাওয়া যাবে?— তার সহজ উত্তর, এক পলিটিকস ছাড়া জীবনের অপর সকল ক্ষেত্রেই। যে শিক্ষার ফলে, আমাদের নব মনোভাব জন্মেছে, সে শিক্ষা বাঙলা থেকে অন্তর্হিত হয় নি; বরং তার প্রসার ও প্রভাব বাঙলাদেশে দিনের পর দিন শুধু বেড়েই চলেছে। সুতরাং বাঙালীর চৈতন্য ইতিমধ্যে জড়ীভূত হয়ে যাবার কোনও কারণ ঘটে নি। তারপর সে চৈতন্যের ক্রমবিকাশ যিনি খুসি তিনি ইচ্ছা করলেই সাহিত্যে বিজ্ঞানে ও কর্মক্ষেত্রে দেখতে পাবেন। অবশ্য রাজনীতির কঠো-বক্তিয়া এ সব জিনিষের বড় বেশী খোঁজ রাখেন না, তাঁদের ধারণা যে, রাজনীতিই হচ্ছে জাতীয় জীবন গড়ে' তোলবার একমাত্র উপাদান ও উপায়। লোকের সামাজিক জীবন দেশের রাষ্ট্রতন্ত্রের কতটা অধীন, আর দেশের রাষ্ট্রতন্ত্র লোকের সামাজিক জীবনের কতটা অধীন, এবং এ উভয়ের মধ্যে কার্যকারণের কি সম্বন্ধ আছে, সে সব তর্ক এক্ষেত্রে



তোলা নিশ্চয়োজন, কেননা দেশের কথা বলতে আজকাল অনেকে রাজনীতির কথাই বোঝেন, সে কথার এই সঙ্কীর্ণ অর্থ গ্রাহ্য করে নিয়েই আমি এ বিষয়ে দু'টি চারুট কথা বলতে উত্তত হয়েছি।

আজকালকার দিনে মানুষের পক্ষে তার রাজনৈতিক অবস্থা যে উপেক্ষা করা চলে না—একথা বলাই বাহুল্য। তারপর রাষ্ট্রতন্ত্রের পরিবর্তনের পক্ষে রাজনৈতিক আন্দোলন যে, একটি প্রকৃষ্ট অন্তত প্রচলিত উপায়, সে-কথাও আমরা স্বীকার করতে বাধ্য। তবে যে বাঙালী জাতি এ বিষয়ে কতকটা ঊর্দাসিদ্ধ প্রকাশ করছে তার কারণ, একমাত্র বক্তৃতার উপর বাঙালীর আস্থা কমে এসেছে। কেন কমে এসেছে তার কারণ কি আর খুলে বলা দরকার? কে না জানে যে, ইতিমধ্যে বাঙ্গালীর মন পলিটিকালি কিষ্কিৎ পোড়ু খেয়েছে—সুতরাং সে মন সহজে আর কারও কথায় ভেঙ্গে না। তা ছাড়া আমার বিশ্বাস যে, বহুলোকের মনে এ ধারণা জন্মেছে যে, আমাদের জাতীয় জীবন গড়ে তোলবার সমস্যাটা এতই জটিল ও গুরুতর যে-কোন সহজ উপায়ে তার সমাধান করা যেতে পারে না।

আর এক কথা, আমাদের রাজনৈতিক নেতাদের উপর আমরা অনেকে একান্ত নির্ভর করতে পারিনে। তার একটি কারণ, তাঁদের সকল কথা, সকল ব্যবহার আমাদের সকলের কাছে সমান স্ব-বোধ নয়। এই ধরুণ না, বাঙলার রাজনৈতিক দলে কেন যে একটা দলাদলীর সৃষ্টি হয়েছে, তার কারণ আমরা সকলে খুঁজে পাইনে। আমাদের অনেকেরই বিশ্বাস যে, রিকরুণ নিয়ে সকলের একমত হওয়ার কোনই বাধা ছিল না। বাঙলার নেতারাজী আজ দেড় বৎসর ধরে পরস্পরের সঙ্গে যে রকম জাতি-শত্রুতা স্বরু করেছেন,

তার থেকে তাঁরা নিজেদের মন নিজেরা জানেন কিনা, সে বিষয়েও সন্দেহ হয়। এবং মধ্যে মধ্যে তাঁরা এমন এক একটা ব্যবহার করে বসেন যে, আমাদের মনে সে সন্দেহ আরও বন্ধমূল হয়ে পড়ে।

রাজনৈতিক আন্দোলন অবস্থা একমাত্র কথার সাহায্যেই করতে হয়, এবং কথারও যে একটা শক্তি আছে, সে সত্য কিছুতেই অস্বীকার করা চলে না। বাক্যযুদ্ধও ত একটা যুদ্ধ বটে এবং এ যুদ্ধে কথাই হচ্ছে মানুষের অস্ত্র-শস্ত্র, এমন কি স্থল বিশেষে তা poisonous gas-ও হতে পারে! তবে কথার কোনই শক্তি থাকে না, যদি না তার কোনও অর্থ থাকে। রাজনীতিতে আমরা বিলৈতি কথা নিয়ে কারবার করি, সম্ভবত সেই কারণে আমাদের দেশী নেতাদের মুখে সে সব কথা অনেক সময়ে নিরর্থক হয়ে পড়ে। এবং এই কারণেই তাদের কথার প্রতি আমাদের আস্থা দিন দিন কমে আসছে। যদি liberty এবং equality শব্দের পুরো অর্থ আমাদের নেতা মহাশয়দের সর্বদা স্মরণ থাকত তাহলে, তাঁরা বশে কংগ্রেসে, আমেরিকা ও ফ্রান্সের নকল করে "Rights of man" declare করে, তার দু'দিন পরেই গিমলার লাট দরবারে উপস্থিত হয়ে প্যাটেল বিল সম্বন্ধে, না-হুঁ, না-হুঁ করতেন না। পলিটিয়ের ক্ষেত্রে স্বাধীনতার নাম শুনে বাঁদের বুক ফুলে'ওঠে, সামাজিক ক্ষেত্রে স্বাধীনতার নাম শুনে' তাঁদের যে মুখ শুকিয়ে যায়, এই স্পষ্ট প্রমাণ যে, liberty প্রভৃতি শব্দ তাঁদের কথা মাত্র, ভাষায় যাকে বলে 'বুলি'।

আমাদের নেতাদের স্মরণ রাখা উচিত যে, যে কথা ঘারবন্ধ, গিধড় প্রভৃতি রাজা-মহারাজাদের মুখে শোভা পায়, সে কথা তাঁদের মুখে শোভা পায় না, কেননা আমরা আশা করি যে, কি বিছায় কি বুদ্ধিতে,

কি জ্ঞানে, কি চরিত্রে তাঁরা উক্ত রাজা-মহারাজাদের দলভুক্ত নন। বশে মাদ্রাজের তুলনায় আমাদের আত্মা যতই ঘুমিয়ে থাকে না, একথা বোধ হয় জোর করে বলা যায় যে, বেহারী জমিদারদের চাইতে আমাদের পলিটিকাল আত্মা কিঞ্চিৎ বেশি প্রবুদ্ধ। কিন্তু যখন দেখি যে, দ্বারবন্দের মহারাজা ধুয়ো ধরলে আমাদের কোন কোন নেতা অমনি দোহার দিতে সুরু করেন, তখন তাঁদের রাজনীতির বর্ণপরিচয় হয়েছে কিনা সে বিষয়ে সন্দেহ হয়।

রাজনীতির নেতাদের যে রাজনীতির বর্ণপরিচয় হয় নি এমন কথা আমরা বলতে চাই নে। তাঁরা যে উন্টো উন্টো কথা বলেন, এবং উন্টো উন্টো ব্যবহার করেন, সে হয়ত চাল হিসেবে। কিন্তু আমরা যেহেতু নেতাদের চালের গুঢ় অর্থ বুঝি নে, সে কারণ আমরা তাঁদের কথার সাদা অর্থ বুঝতে চাই, এবং যতক্ষণ তা না বুঝতে পারি, ততদিন তাঁদের কথায় নেচে উঠতে পারি নে, যদি কিছু পারি ত হেসে উঠতে। বঁারা প্যাটেল বিলের বিরুদ্ধে ঝড়গস্ত হয়ে ওঠেন, তাঁদের এ যুগের রাজনীতির কোন কথা মুখে আনবার পর্য্যন্ত যে অধিকার নেই, এই সহজ কথাটা যতদূর সম্ভব সহজ কথায় বোঝাতে চেষ্টা করব। কথাটা সহজ এই কারণে যে, বর্তমান রাজনীতির মূল কথাগুলির জন্ম যদিচ ইউরোপে হয়েছে; কিন্তু তা সকল দেশের সকল মানবের প্রাণের কথা, কেননা যেখানেই মানুষের প্রতি মানুষের শ্রদ্ধা আছে—সেখানেই স্বাধীনতা ও সাম্যের ধর্ম, মানুষের মনকে অধিকার করে বসবে।

( ২ )

আজকাল আমাদের রাজনীতির রাজ্যে দু'টি কথা নিত্যই শোনা যায় এবং তা ছাড়া আর কিছুই শোনা যায় না। সে দু'টি হচ্ছে self-determination এবং democracy. আমাদের হাল পলিটিক্সের সকল বলা-কওয়া, সকল আশা-ভরসা এই দু'টি শব্দের উপরেই প্রতিষ্ঠিত। আমাদের নেতারা এই দু'টি শব্দের মন্ত্র-শক্তিতে এতদূর আত্মবান যে, এবারকার কংগ্রেস Peace Conference-এর জন্ম delegate নির্বাচন করেছেন! কংগ্রেস যদি self-determination শব্দের মোহিনী-শক্তিতে মোহপ্রাপ্ত না হ'তেন,—তাহলে কি এমন বাহুজ্ঞান শূন্যতার পরিচয় দিতেন? সে যাই হোক, আমাদের পলিটিকাল বল-বুদ্ধি-ভরসা সকলই যখন এই দু'টি শব্দের উপর নির্ভর করছে, তখন কথা দুটির অর্থ বোঝবার চেষ্টা করা যাক। ভুলে গেলে চলবে না যে, কথা দুটি শুধু বিলেতি নয়, তার অর্থও বিলেতি।

প্রথমত ডিমোক্রাসি বলতে কি বোঝায়, তার সন্ধান ডিমোক্রাসির স্রষ্টা এবং স্রষ্টাদের কাছে নেওয়া যাক, কেননা self-determination মতটা এই ডিমোক্রাসি হতেই উদ্ভূত। এই ডিমোক্রাসি শব্দের তিনটি সংজ্ঞা আমি নিম্নে উদ্ধৃত করে দিচ্ছি।

1. "Everybody is to count for one and nobody for more than one"—*Bentham*.
2. "Democracy is the government of the whole people by the whole people"—*Mill*.
3. The progress of all through all"—*Mazzini*.



মধ্যপথ অবলম্বন করা পৃথিবীর সকল ক্ষেত্রেই নিরাপদ ; সুতরাং এ ক্ষেত্রেও মিলের ব্যাখ্যাই গ্রাহ্য করা যাক। ম্যাটসিনির সূত্র গ্রাহ্য করবার পক্ষে বাধা এই যে, তা দর্শনের কোঠায় পড়ে এবং আর বেহুমের সূত্র গ্রাহ্য করবার পক্ষে বাধা এই যে, তা পাটীগণিতের কোঠায় পড়ে। সংক্ষেপে ম্যাটসিনির সংজ্ঞাকে অনেকটা সঙ্কুচিত এবং বেহুমের সংজ্ঞাকে অনেকটা প্রসারিত না করলে তা রাজনীতির সূত্র হয়ে দাঁড়ায় না। সুতরাং ধরে নেওয়া যাক যে, সকলের দ্বারা সকলের শাসন-পদ্ধতির নামই ডিমোক্রাসি।

কিন্তু এইখানে একটা প্রশ্ন ওঠে। সকলের দ্বারা সকলের শাসনের কি কোনও অর্থ আছে, রাজা প্রজার কি অধিকার ভেদ নেই, রাজ্য-শাসন বিষয়ে সকলেই কি সমান অধিকারী? আর যদিই বা তা হয়, তাহলে সকলের দ্বারা সকলের শাসন যে সু-শাসন হবে তারই বা মানে কি?

ডিমোক্রাসির প্রতিবাদীরা এ প্রশ্ন ইউরোপে একবার নয়, হাজার বার তুলেছেন এবং ডিমোক্রাসির বিরুদ্ধে এই তর্ক তুলে এক আধখনা নয়, হাজার হাজার বই লিখেছেন।

এ প্রশ্নের উত্তরে ডিমোক্রাসির স্বপক্ষের যে কি বক্তব্য, সে সম্বন্ধে আমি বর্তমান যুগের একটি বড় ঐতিহাসিকের কথা নিম্নে উদ্ধৃত করে দিচ্ছি :-

“One theory regards the definite purpose of the government to be the assurance of liberty to the individual. \* \* \* Such is the theory of the Liberal Radicals”—*Seignobos*.

অর্থাৎ ডিমোক্রাসি শ্রেষ্ঠ রাষ্ট্রতন্ত্র, কেননা এই তন্ত্রের প্রসাদে প্রতি ব্যক্তিকে স্বাধীনভাবে জীবনযাত্রা নির্বাহ করবার সম্পূর্ণ সুযোগ পায়। বলা বাহুল্য যে, ডিমোক্রাসির ভক্তেরা বিশ্বাস করেন যে,—

Individuals should be allowed to develop without restraint. They will be happier and more active, they will be able to make more progress, society will regulate itself better than under established rules”—*Seignobos*.

অতএব দাঁড়াল এই যে, যিনি individual liberty অর্থাৎ ব্যক্তি-স্বাভ্যন্তর্যর মাহাত্ম্যে বিশ্বাস না করেন, ডিমোক্রাসির নাম উচ্চারণ করবার তাঁর অধিকার নেই। এখানে আর একটি কথা বলে রাখি, ডিমোক্রাসি এ যুগে ইউরোপে একটি দার্শনিক মত মাত্র নয়, এখন তা সমাজের ধর্ম। ডিমোক্রাসি সে দেশে এখন শুধু বইয়ের ভিতর নেই,—জীবনে প্রতিষ্ঠিত হয়েছে। আমি একটি পূর্ব-প্রবন্ধে *Seignobos*-এর ইতিহাস থেকে ইউরোপের বর্তমান সমাজের ধর্মকর্মের যে বর্ণনা উদ্ধৃত করে দিই, এখানে তা পুনরুদ্ধৃত করে দিচ্ছি :-

“বর্তমানে সমাজ ব্যক্তিগত স্বাধীনতার উপর প্রতিষ্ঠিত। এ যুগে মানুষের উপর মানুষের কোনও অধিকার নেই। প্রতি লোককেই নিজের ইচ্ছা, রুচি ও চরিত্র অনুসারে নিজের জীবন গঠন করতে পারে। প্রাচীন প্রথার বন্ধন থেকে সবাই মুক্ত। ধর্ম সম্বন্ধে চিন্তা সম্বন্ধে, মতামত প্রকাশ সম্বন্ধে সকলেরই সমান স্বাধীনতা আছে। ইউরোপে মানুষ আজ মানুষের দাস নয়।”

অতএব একথা নির্ভয়ে বলা যেতে পারে যে, ব্যক্তিগত স্বাধীনতাই

হচ্ছে ডিমোক্রাসির গোড়ার কথা, আর শেষ কথা এবং ঐ স্বাধীনতাই হচ্ছে ডিমোক্রাসির ভিত্তি ও চূড়া।

স্বাধীনতাই হচ্ছে ডিমোক্রাসির মূলমন্ত্র; কিন্তু এই স্বাধীনতা শব্দের অর্থ কি? ফ্রান্সের যে declaration-এর নকলে আমাদের নেতারা বস্তুতে নিজেরা এক declaration করেছেন, সেই দলিলেই liberty শব্দের অর্থ পাওয়া যাবে। সে declaration of Rights-এর চতুর্থ দফাটি নিম্নে উদ্ধৃত করে দিচ্ছি।

“Liberty consists in the power to do anything that does not injure others; thus, the exercise of the natural rights of every man has only such limits as to assure to other members of society the enjoyment of the same rights. These limits can only be determined by law.”

এ সংজ্ঞার অনেক খুঁত ধরা যায়, কিন্তু liberty-র এ ব্যাখ্যা মোটা-মুটি সত্য এবং এই সত্যের উপরেই ডিমোক্রাসি প্রতিষ্ঠিত। স্মরণ্য ঝাঁরা রাষ্ট্রতন্ত্রে ডিমোক্রাসি চান, তাঁদের পক্ষে প্যাটেল-বিলের বিরুদ্ধাচরণ করাটা মুর্থতা ছাড়া আর কিছুই নয়। প্রাচীন প্রথার বন্ধন থেকে মুক্তিলাভ করে নিজের ইচ্ছা ও রুচি অনুসারে বিরোধ করবার অধিকার হচ্ছে মানুষের একটি স্বাভাবিক অধিকার, এবং এ অধিকার মত দিন আইনের সাহায্যে প্রতিষ্ঠিত না হয় ততদিন সে অধিকারে প্রতিলোক বঞ্চিত। এ ক্ষেত্রে ধর্মনীতি এবং সমাজের দোহাই দেওয়াটা ডিমোক্রাসি-বিধেমানদের চিরকালে স্বভাব। ইউরোপের লোকেরা যখন খৃষ্টীয় শাসন-তন্ত্রের বন্ধন থেকে মুক্ত হয়ে স্বাধীনভাবে

বিবাহ করবার অধিকার দাবী করে, তখনও সে দেশের absolutist-রা বরাবর ঐ ধর্ম নীতি ও সমাজ রক্ষার দোহাই দিয়ে এসেছে। জার্মানীর উদাহরণ নেওয়া বাক। জার্মানীর শিবারলরা চিরকালই বিবাহ সম্বন্ধে এই স্বাধীনতার দাবী করত, কিন্তু সে দেশের ধর্মযাচকেরা এবং রাজ-পুরুষেরা চিরদিনই তার বিপক্ষে দাঁড়িয়েছিলেন। শেষটা ১৮৭৪ খৃষ্টাব্দে জার্মান-সম্রাট দেশের লোককে এ অধিকার দিতে বাধ্য হন। সে সময় কনসারভেটিভের দল গভর্নমেন্টকে এই বলে আক্রমণ করেন যে, গভর্নমেন্ট “ফ্রান্সিয়াকে ইউরোপ করে তুলছে এবং সেই সঙ্গে ধর্ম এবং সমাজের মূলচ্ছেদ করছে”। প্যাটেল-বিলের বিরুদ্ধেও অভিযোগ এই যে, তার ফলে হিন্দুসমাজ ইউরোপীয় সমাজ হয়ে পড়াবে এবং ধর্ম ও সমাজ উচ্ছিন্ন যাবে। একথা ঝাঁরা বলেন তাঁদের মুখে ডিমোক্রাসির নাম, জীববিশেষের মুখে রাম নামের মতই শোনায়।

শেষে self-determination অর্থ সম্বন্ধে দু'একটি কথা বলতে চাই। যে ব্যক্তিগত স্বাধীনতা democracy-র মূলমন্ত্র, সেই ব্যক্তিগত স্বাধীনতাই হচ্ছে self-determination-এর গোড়ার কথা। যে স্বাধীনতা পূর্বে সভ্য-সমাজের কাছে ব্যক্তিগত হিসাবে প্রায় হয়েছিল, সেই স্বাধীনতা এখন জাতিগত হিসেবে প্রায় হচ্ছে। এক একটি জাতিকে এক একটি ব্যক্তি হিসেবে গণ্য করে, সে জাতির যে নিজের ইচ্ছা রুচি ও চরিত্র অনুসারে জীবন গঠন করবার অধিকার আছে, এই মতটাই বিশেষত্ব নাম হচ্ছে self-determination. বেহুস্মের কথায় বলতে গেলে এ মতে প্রতি জাতিই is to count for one এবং কোন জাতিই is not to count for more than one এবং declaration of



rights-এর ভাষায় বলতে গেলে, প্রতি জাতিরই স্বাধীনতা আছে—  
to do anything which do not injure others, কিন্তু এ  
ক্ষেত্রে একটি কথা সকলকে স্মরণ রাখতে বলি যে, একটি জাতির  
কোনও self নেই—ব্যক্তির ধর্ম জাতিতে আরোপ করে' আমরা  
জাতিকে ব্যক্তি বলি। Self-determination ব্যক্তির পক্ষেই প্রকৃত  
জাতির পক্ষে আরোপিত মাত্র। সুতরাং ব্যক্তিগত self-deter-  
mination-য়ে বাঁরা বিশ্বাস করেন না, তাঁদের মুখে national self-  
determination-এর কথা কাকাতুয়ার বুলি ছাড়া আর কিছু নয়।  
ডিমোক্রাসি, লিবারালিজম প্রভৃতি শব্দ বাঁদের পক্ষে মুখের কথা নয়  
কিন্তু ধর্ম বিশ্বাসের সামিল তাঁদের কাছে ও সকল শব্দের অর্থ যে  
কি, একটি উচুদরের ইংরাজ লেখকের কথায় তার পরিচয় দিচ্ছি:—

“Liberalism is the belief that society can safely be founded  
on this self-directing power of personality, that it is only on  
this foundation that a true community can be built, and that  
so established its foundations are so deep and so wide that there  
is no limit that we can place to the extent of the building.  
*Liberty then becomes not so much a right of the individual as  
a necessity of society*” :—L. T. Hobhouse.

বাঁরা সমাজ হিতের দোহাই দিয়ে ব্যক্তিগত স্বাধীনতাকে পদ  
করতে চান,—তাঁদের উপরোক্ত কথা ক'টি একটু মন দিয়ে পড়তে  
অনুরোধ করি।

শ্রী প্রমথ চৌধুরী।